

# ಬೆಂಗಳೂರ್ ಕೊಡವ ಸಮಾಜತರ ಪತ್ರಿಕೆ

# ಪೊಂಬೊಳಕ್

Pombolak Kodava Monthly... ಕೊಡವಾಮೆರ ಬೊಳಜ

ಕ್ರಯ : 10 ಉರ್‌ಪಿಯ

ಸಂಪುಟ:9 ಸಂಚಿಕೆ: 8 ಏಪ್ರಿಲ್ 2013 ಪೊಂಬೊಳಕ್-ತಿಂಗಳಪತ್ರಿಕೆ ಕೊಡವ ಸಮಾಜ, ಬೆಂಗಳೂರ್. Reg.No.: KARKOD00000/10.01.2011.TC 0:080-22260188 ಒಟ್ಟು ಪಾಳೆ 8

## ಬೆಂಗಳೂರ್ ಜನರಲ್ ಕೆ.ಎಸ್.ತಿಮ್ಮಯ್ಯ ಪುಟ್ಟಿನ ದಿನ



ಬೆಂಗಳೂರ್ ಕೊಡವ ಸಮಾಜ-ತರ ಆದನಲ್, ತಾ.31.3.2013 ಂದ ದೇಶತರ ಮಹಾನ ಸೇನಾನಿ ಜನರಲ್ ಕೊಡಂದೇರ ಎಸ್. ತಿಮ್ಮಯ್ಯಂಡ 107ನೇ ಪುಟ್ಟಿನ ದಿನತರ ಗೇನತ್ ನಗರಲ್ ಎಎಸ್‌ಸಿ ಸೆಂಟರ್‌ಲ್ ಉಳ್ಳ ಅಯಿಂಡ ಪ್ರತಿಮೆಕ್ ಪಿಂಞ ಸಮಾಧಿಕ್ ಪೂವ್ ಇಟ್ಟ್ ಗೌರವ ಕಾಟ್‌ಚಿ. ಕೊಡವ ಸಮಾಜ ಅಧ್ಯಕ್ಷ ಚಿಪ್ಪುಡಿರ ಎಂ.ಸುಬ್ಬಯ್ಯಂಡ ಮುಂದಾಳ್ತನತ್ ನಡಂದ ಸವಾರಂಭತ್ ಸಮಾಜ ಉಪಾಧ್ಯಕ್ಷಿಣಿ ಮುಕ್ಕಾಟೀರ ವಾಣಿ ನಾಣಂತ್ ಕಾರ್ಯದರ್ಶಿ ಚೇನಂಡ್ ಎ.ವರಾದಪ್ಪ. ಬಲ್ಲಡಿಚಂಡ ಎ. ಮಾಚಯ್ಯ, ಪದಾಧಿಕಾರಿಯ, ಮೇಜರ್ ಜನರಲ್ ಕೆ.ಎಸ್. ವೇಣು ಗೋಪಾಲ ವಿ.ಎಸ್.ಎಂ., ಜಿಪಿ ಕೆ ಪಿಂಞ ಕೆ ಸವಾ ಬೆಂಗಳೂರ್. ಕೊಡವ ಸಂಘಕಾರ, ನಿವೃತ್ತ ಸೇನಾನಿಯ ಕೂಡಿತಿಂಜತ್.

ಪೋಟೋಸ್ 2ನೇ ಪಾಳೆಲ್

## ಶ್ರೀ ಕಾವೇರಿ ಸ್ಕೂಲ್ ಗ್ರಾಜುವೇಶನ್ ಡೇ



ಬೆಂಗಳೂರ್ ಕೊಡವ ಸಮಾಜತರ ಆದನಲ್ ನಡಂದಂಡುಳ್ಳ, ಇಂದಿರಾ-ನಗರ ಶ್ರೀ ಕಾವೇರಿ ಸ್ಕೂಲ್ ಪತ್ರನೇ ಕ್ಲಾಸ್ ಮಕ್ಕಡ್ ಗ್ರಾಜುವೇಶನ್ ಡೇ ತಾ.9.3.2013ಂಡ್ ಬೈಟಾಪಕ ನಡಂದತ್. ಮುಖ್ಯ ಬೆಂದು-ವಾಯಿತ್ ವಾಣಿಜ್ಯ ತೆರಿಗೆ ಇಲಾಖೆ ಅಧಿಕಾರಿ ಬೈರಾಜಂಡ ಎ. ನಾಣಿಯಪ್ಪ ಬಂದಿತಿಂಜತ್. ಕೊಡವ ಸಮಾಜ ಅಧ್ಯಕ್ಷ ಚಿಪ್ಪುಡಿರ ಎಂ. ಸುಬ್ಬಯ್ಯ ಕಾರ್ಯದರ್ಶಿ ಚೇನಂಡ್ ಎ. ವಾದಪ್ಪ ಬೆಂದುವಾಯಿತ್ ಕೂಡಿತಿಂಜತ್. ಕೊಡವ ಸಮಾಜ ಎಜುಕೇಶನ್ ಕೌನ್ಸಿಲ್ ಅಧ್ಯಕ್ಷಿಣಿ ಕೇಳಪಂಡ ದೇಜಿ ಅಚ್ಚಪ್ಪ, ಕಾರ್ಯದರ್ಶಿ ವಾಡಿಯಂಡ ಟಿ. ಚಂಗಪ್ಪ ಪಿಂಞ ಸ್ಕೂಲ್ ಪ್ರಿನ್ಸಿಪಾಲ್ ಗೀತಾ ರಾವ್, ವೈಸ್ ಪ್ರಿನ್ಸಿಪಾಲ್ ಕಡೇಮಾಡ ರಾಣಿ ತಿಮ್ಮಯ್ಯ ವೇದಿಕೆಲಿಂಜತ್. ಮಕ್ಕ ಇಂದೇಶ ಪ್ರಪೋಟಿಯಗತ್ ಏದ್ ಕೋವಲ್ ಪೋಪಕ್ ಸಾಧ್ಯವೋ ಅದಲ್ ಮಿಂಞಕ್ ನುಗಿತ್ ಸಾಧನ ಮಾಡಂಡು. ಅಪ್ಪವ್ ಕಷ್ಟಪಟ್ಟಿತ್ ಓದ್ ಚಿಟ್ರಾಂಗ್ ಸಾರ್ಥಕತ ಪಡೆಯಂಡೂಂಡ್ ಮುಖ್ಯ ಬೆಂದು ಬೈರಾಜಂಡ ಎ. ನಾಣಿಯಪ್ಪ ತಾಂಡ ದಂತ್ ತಕ್ಕಲ್ ಎಣ್ಣಾಚಿ. ಚಿಪ್ಪುಡಿರ ಎಂ.ಸುಬಯ್ಯ ಚೇನಂಡ್ ಎ. ವಾದಪ್ಪ, ಕೇಳಪಂಡ ದೇಜಿ ಅಚ್ಚಪ್ಪ ಪಾಡೆಯಂಡ ಟಿ. ಚಂಗಪ್ಪ ಪಾಡೆಯಂಡ ಟಿ. ಚಂಗಪ್ಪ ಪೋಟೋಸ್ 2ನೇ ಪಾಳೆಲ್

## ಬೆಂಗಳೂರ್ ಕೆಚ್‌ಸಿ ೫೦೦೯-13

ಕೊಡವ ಮಕ್ಕಡಲಿ ಮೊಡಲ್, ಡಾನ್ಸ್‌, ನಟ-ನಟಿಯ, ಬಾಡಿ ಬಿಲ್ಡಿಂಗ್ ಪ್ರತಿಭಾಕಾರಳ ಪ್ರೋತಾಪಿಚಿಡವ ಬಲ್ಯೋರ ವೇದಿಕೆ ಕೆಬಿಸಿ ಬೀರ್ಯ 13'. ಇಯಂಗೆ ಏಪ್ರಿಲ್ 5 ಲಿಂಜಿ ಆಯಾ ಕೋವುಲ್ ಇದಾದ ಉಳ್ಳಯನ ಆಯ್ ಮಾಡಿತ್, ತರಬೇತಿ ಕೊಡತಿತ್ ಪೈಪೋಟಿಕ್ ತಯಾರ್ ಮಾಡ್‌ವದುಂಡ್. ಮೇ 9ಂಗ್ ಬೆಂಗಳೂರ್ ಹೌಡಯ್ಯ ಮಮೋರಿಯಲ್ ಹಾಲ್‌ಲ್ ನಡಪ ಕೆಬಿಸಿ ಬೀರ್ಯ 13' ಸವಾರಂಭತ್ ಸಾಧಕಂಗಳ್ ಇನಾಮು ಕೊಡ್‌ಪದಂಂಡ್. ಏರ ವಿವರಕ್: ರೀನಾ 9141821203/ ಮುತ್ತುಣ್ಣ 9916817398/ ಪ್ರಸಾದ್ 9141893881.

## ಬಾಳೆಗೋಡೆಕ್ 1 ಕೋಟಿ ಮಂಜೂರ್

ಕೊಡವ ಸಮಾಜ ಒಕ್ಕೂಟತರ ಬಾಳೆಗೋಡೆ ಕೊಡವ ಸಾಂಸ್ಕೃತಿಕ ಕೇಂದ್ರಕ್ ರಾಜ್ಯ ಸರ್ಕಾರ ಕಯಿಂಜ ಮಾರ್ಚ್ ಅದ್ ವಾರತ್ 1 ಕೋಟಿ ಉ. ಬುಡ್‌ಗಡೆ ಮಾಡಿತ್. ಸರ್ಕಾರ ಈಂಗ್ ಮುಪ್ಪಡ ಈ ಕೇಂದ್ರಕ್ 2 ಕೋಟಿ ಉ. ಬುಡ್‌ಗಡೆ ಮಾಡಿತಿಂಜತ್. ಸಾಂಸ್ಕೃತಿಕ ಕೇಂದ್ರಕ್ ಸುಮಾರ್ ಕಟ್ಟಡ ಪಣಿ ಚುರ್‌ಕ್‌ಲ್ ನಡಂದಂಡುಂಡ್. ಇಲ್ಲಿ 17ನೇ ಕಾಲತರ ಒಕ್ಕಡೊಕ್ಕಡ ಹಾಕಿಲ್, ಮಾದಂಡ ಒಕ್ಕಡ ಹಾಕಿ ಕಳೆ ನಮ್ಮಯೂ ಇದೇ ಏಪ್ರಿಲ್ 17ಲಿಂಜಿ ಮೇ 4 ಕೆತ್ತಣ್ ನಡಪದುಂಡ್.

## ಜರುನಾಣಿ ಪುತ್ತು ಭಗವತಿ: ಪೊಮ್ಮಂಗಲ



ಮರೆನಾಡಲ್ ಬಿರುಬಾಣಿ ಶ್ರೀ ಪುತ್ತುಭಗವತಿ ದೇವ-ಸ್ಥಾನತ್ ವಿಶೇಷ ಪರಕರ 'ಪೊಮ್ಮಂಗಲ' ಏಪ್ರಿಲ್ 2 ಂಗ ನಡಪದುಂಡ್. ದೇವಡ ನಮ್ಮ ಏ.1 ಲಿಂಜಿ ಸುರುವಾಪ. ವಿವರ 2ನೇ ಪಾಳೆಲ್

## ಜಿ.ತಿಮ್ಮಯ್ಯ 'ಸನ್ನಿ ಸೈಡ್' 5 ಕೋಟಿ

ಮಡಿಕೇರಿಯಳ್ಳ ಜನರಲ್ ಕೊಡಂದೇರ ಎಸ್. ತಿಮ್ಮಯ್ಯಂಡ ಮನೆ(ಆರ್.ಟಿ.ಓ ಆಫೀಸ್) 'ಸನ್ನಿ ಸೈಡ್' ಸ್ಮಾರಕ ಕಟ್ಟಡ ಮಾಡುವಕ್ ರಾಜ್ಯ ಸರ್ಕಾರ 5 ಕೋಟಿ ಉ. ಮಂಜೂರ್ ಮಾಡ್‌ವಕ್ ಬಯಂದಿತ್. ಕೂಡೆ ವೀರಾಜಪೇಟೆಲ್ ಸರ್ಕಾರಿ ಪಾಲಿ ಟೆಕ್ನಿಕ್ ತೊರಪಕೂ ತಾ.12.03.2013ಂಡ್ ನಡಂದ ಮಂತ್ರಿ ಮಂಡಲ ಸಭೆಲ್ ತೀರ್ಮಾನ ಮಾಡಿತ್.

## ಏಪ್ರಿಲ್ 14ಂಗ್ ಜನು ಚಂಗ್ರಾಂಧಿ ಕೊಡಗಲ್ ಏಪ್ರಿಲ್ 14ಂಗ್

ನಲ್ಲ ದಿನಾಂಡ್ ಅಂಡ್ ಕೃಷಿಕಂಗೆ ಬೇಲ್‌ಪಣಿ ಕೊಡನನಕೆ ಬೋರ ನಲ್ಲ ಕಾರ್ಯಕ್ ಇಳಿವದುಂಡ್.

## ಬೆಂಗಳೂರ್ ಕೊಡವ ಸಮಾಜ ವಿದ್ಯಾನಿಧಿಕ್ 1 ಲಕ್ಷ ದಾನ



ಬೆಂಗಳೂರ್ ಕೊಡವ ಸಮಾಜತರ ವಿದ್ಯಾನಿಧಿಕ್ ಯುನೈಡೆಡ್ ಕಿಂಗ್‌ಡಮ್‌ಲ್ ಉಳ್ಳ ಕುಮಾರಿ ಚೆಂಬಾಂಡ-ಉಮಾ ಕುಶಾಲಪ್ಪ ತಾಂಡ ಅಪ್ಪ ಡಾ. ಚೆಂಬಾಂಡ ಕಾರ್ಯಪ ಕುಶಾಲಪ್ಪ ಪಿಂಞ ಅಪ್ಪ ಚೆಂಬಾಂಡ ಮುತ್ತು ಕುಶಾಲಪ್ಪ (ತಾಮನೆ: ಕೋಟೆ: ಚಿಣ್ಣಪ್ಪಂಡ ಮೋವ) ಂಡ ಪೆದತ್ ಒಲ್ ಲಕ್ಷ ಉಲ್‌ಪಿಯ-ದಾನ ಮಾಡಿತ್. ಉಮಾ ಕುಶಾಲಪ್ಪಯಿಂಗ ಸಮಾಜತ್ ಉಪಾಧ್ಯಕ್ಷಿಣಿ ಮುಕ್ಕಾಟೀರ ವಾಣಿ ನಾಣಿಯ್ ಪಿಂಞ ಡಾ. ಚೆಂಬಾಂಡ ಚೇನಂಡ ಎ. ಮಾದಪ್ಪ-ಯಿಂಗ್ ದಾನತರ ಚೆಕ್ ಕೊಡತ್. ಪೋಟೋಸ್ 2ನೇ ಪಾಳೆಲ್

ಬೆಂಗಳೂರ್ ಕೊಡವ ಸಮಾಜ ವೆಬ್‌ಸೈಟ್  
www.kodavasamajabangalore.in Email : kodavasamajablr@gmail.com

**ಬೆಂಗಳೂರ್ ಜನರಲ್ ಕೆ.ಎಸ್.ಆಮ್ಸಯ್ಯ ಪುಟ್ಟನ ದಿನ**



**ಶ್ರೀ ಕಾವೇರಿ ಸ್ಕೂಲ್ ಗ್ರಾಜುವೇಶನ್ ಡೇ**



**ಬೆಂಗಳೂರ್ ಕೊಡವ ಸಮಾಜ ವಿಧ್ಯಾನಿಧಿಕ್ 1 ಲಕ್ಷ ದಾನ : ದಾನಿಯ**



ದಾನಿರ ಕೂಡ ಕೊಡವ ಸಮಾಜತ್ ಉಪಾಧ್ಯಕ್ಷಿಣಿ ಮುಕ್ತಾಟೀರ ವಾಣಿ ನಾಣಿಯ್ಕ ಪಿಂಞ ಕಾರ್ಯದರ್ಶಿ ಚೇನಂದ ಎ. ಮಾದಪ್ಪ ಡಾ. ಚೆಂಬಾಂಡ ಕಾರ್ಯಪ್ಪ ಕುಶಾಲಪ್ಪ ಪಿಂಞ ಚೆಂಬಾಂಡ ಮುತ್ತು ಕುಶಾಲಪ್ಪ (ತಾಮನೆ: ಕೋಟೆರ)

**ಬಿರುನಾಣಿ: ಪುತ್ತು ಭಗವತಿ 'ಪೊಮ್ಮಂಗಲ'**



ಕೊಡಗಲ್ ಬಿರುನಾಣಿರ ಶ್ರೀ ಪುತ್ತು ಭಗವತಿ ದೇವ-ಸ್ಥಾನತ್ ಪೊಮ್ಮಂಗಲ ಎಣ್ಣುವ ವಿಶೇಷಪಟ್ಟಿ ಪರಕೆ ಒಪ್ಪು ಚಿಡವ ಮಂಗಲಪೂಜೆ ಕಾರ್ಯ ಕಾಲೋಡಿ ನಡಂದಂಡ್ ಬಂದಿತ್. ದೇವಸ್ಥಾನತ್ ಈಯಾಂಡ್ ಕಾಲತ್ ನಮ್ಮ ವಿಪ್ರಿಲ್ 1.ಲಿಂಜಿ ಸುರುವಾಪುದುಂಡ್; ತಾ. 3ಂಗೆ ಬಲ್ಯ ನಮ್ಮ. ಅದಂಗ್ ಒನ್ನಾಂದಕ್ ಮುಪ್ಪಡ್ ವಿಪ್ರಿಲ್ 2ಂದ್ ವಿಶೇಷ ಪೊಮ್ಮಂಗಲ-ಪೂಜ್ ಪರಕೆ ಮಂಗಲ ಎಣ್ಣುವ ವಿಶೇಷ ಪರಕೆ ಮಂಗಲ+ ಪೂಜೆ ನಡಪ್. ಕಷ್ಟ ಪರಿಹಾರ ಆಂಡೊಂಡ್, ನಲ್ಲ ಆರೋ-ಗ್ಯಕಾಯಿಶೂ, ಮಂಗಲ ಭಾಗ್ಯ ಬರಡ್ ಎಂದೂ, ಒಕ್ಕಕ್ ನಲ್ಲದಾಡ್ ಎಂದೂ ಪೆತ್ತವ್ಪು ಮಕ್ಕಡ 'ಪೊಮ್ಮಂಗಲ' ಕಯಿಪಕ್ ಪರಕೆ ಪೂತವ-ದುಂಡ್. ಅಲ್ಲಿಯತ ಊರ್ ದೇವ ಶ್ರೀ ಪುತ್ತು ಭಗವತಿಕ್ ಪರಕೆ ಪೂತ್ಯೆಂದ್ ವು ನಮ್ಮರ ಸಂದರ್ಭತ್ ಮನಲ್ 'ಪೊಮ್ಮಂಗಲ' ಎಣ್ಣುವ ಮಂಗಲ ಕಯಿಪ್. ಪರಕೆರ ಫಲಿತ್ ಮಕ್ಕಕ್ ದುಂಬಾ ನಂದಾಯಿತಂದೂ ಎಣ್ಣುವ.

'ಪೊಮ್ಮಂಗಲ' ಮನಲ್ ಪರಕೆ ಪೂತಯಿಂಡ್ ಪೆದತ್ ಅಪ್ಪವ್ ತಂಗಡ ಮನಲ್ ಚಿರಿಯೊಂ ಮಂಗಲ ಕಾರ್ಯ ನಡತಂಡು. ಮೋಂವೊನಾನಕ ಮಂಗ-ಕರ್ತಿರ ಉಡಪ್ಪ, ಮೋವಳಾನಕ ಮಂಗಲ-ಕಾರಂಡ ಉಡಪ್ಪ ಇಡ್-ಚಿಟ್ಟಿತ್ ಪದ್ಧತಿ ಪೋಲೆ ಮಂಗಲ ಕಯಿಪ್ ದೇ ಪೊಮ್ಮಂಗಲ. ಪೊಮ್ಮಂಗಲಕ್ ಮಂಗಲ ಕಾಗದ ಮುದ್ರಿ-ಚಿಟ್ಟಿತ್, ಸಂಸಾರ, ಊರ್ ನಾಡ್, ಬೆಂದು-ಚಂಜಾ-ದಿಯಳ ಕಾಕಿ ಕೂಟ್ವ. ಮಂಗಲಕಾರ / ಮಂಗಲ-ಕರ್ತಿಕ್ ಪದ್ಧತಿ ಪೋಲೆ ಎಲ್ಲಾ ಸಂಪ್ರದಾಯ ಮಾಡಿತ್, ಪಣಿ ಕಟ್ಟವ್. ಬಂದಯಿಂಗೆ ಭರ್ಜರಿ ಊಟೊಪಚಾರ ಬಳಂಬುವ. ಆಖೀರಿಕ್ ವಾಲಗತಾಟ್ ಆಡಿತ್ ಪಿರಿವ.

ಬೈಟಾಪಕ ನಾಲ್ ಗಂಟೆಕ್ ಪೊಮ್ಮಂಗಲ ಕಯಿಚಿ ಎಲ್ಲಾರೂ ಆದೇ ಮಂಗಲ ಪೊರಪಾಡ್ ತಮಾಂವಂಡ ಕೂಡ ಪುತ್ತು ಭಗವತಿ ದೇವಸ್ಥಾನಕ್ ಬರಂಡು. ಅಲ್ಲಿ ಎಲ್ಲಾರು ಒಕ್ಕಚಿ ಕೂಡಿತ್ ಮಂಡಲ್ ಕಳಸ ಬೆಚ್ಚಂಡ್ ಪುತ್ತು ಭಗವತಿ ದೇವಸ್ಥಾನತ್ ರ್ ಪದ್ದಕ್ಕಿಣಿ ಬರಂಡು. ಅದಾನದು ದೇವಸ್ಥಾನತ್ ಒಳ್ಳಕ್ ಪೋಯಿತ್ ಕಳಸ ಉಳ್ಳಪಿತ್ ದೇವಕ್ ವಿಶೇಷ ಪೂಜೆ ಮಾಡ್ ಚಿಟ್ಟಿತ್ ತಂಗಡ ಪರಕೆನ ತೇತವ. ಅಲ್ಲಿಂಜಿ ಮಂಗಲ ಪೊರಪಾಡ್ ಬಟ್ಟೆನ ಮಾತಿತ್ ನಮ್ಮಲ್ ಕೂಡಿಯಾಡುವದ್ ನಡಪ್. ಮರೆನಾಡ್ ಅಲ್ಲತೆ ಸುತ್ಯಾಮುತ್ ನಾಡ್ ಸುಮಾರ್ ಮಕ್ಕಳೂ (ಚಿರಿಯವು + ಬಲ್ಯವು) ಬಿರುನಾಣಿ ಶ್ರೀ ಪುತ್ತು ಭಗವತಿಲ್ ಪೊಮ್ಮಂಗಲ ಕಯಿಚಂಡ್ ಬಂದಂಡುಂಡ್. ಕಾಲತಂಜ ಕಾಲಕ್ ದೇವ-

ಸ್ಥಾನ ದುಂಬಾ ಅಭಿವೃದ್ಧಿ ಆಯಿತ್. ಇನ್ನನಾಯಿತ್ ಬಿರುನಾಣಿ ಶ್ರೀ ಪುತ್ತು ಭಗವತಿ ನಮ್ಮ ಪಿಂಞ ಪೊಮ್ಮಂಗಲ ಕೇಳಿಪಟ್ಟಿತುಂಡ್.

**ಪಳಂಗಡ ಕೆ. ಚಂಗಪ್ಪ**

**ಹಂಪಿ ವಿವಿ ರಿಜಿಸ್ಟ್ರಾರ್**  
**ತಂಬಂಡ ವಿಜಯ್ ಪೂಣ್ಣಚ್ಚ**  
ಹಂಪಿ ಕನ್ನಡ ವಿಶ್ವವಿದ್ಯಾಲಯತ್ ರ ಓಲ್ ರಿಜಿಸ್ಟ್ರಾರ್ ಆಯಿತ್ ತಂಬಂಡ ವಿಜಯ್ ಪೂಣ್ಣಚ್ಚ ನೇಮಕ ಆಯಿತ್.

**ಬಾಳೆಲೆಲ್ ಅಡ್ಡೆಂಗಡ ಕಘ್ ಕ್ರಿಕೆಟ್ ಕಳೆ ನಮ್ಮ**

ಬಾಳೆಲೆ ವಿಜಯಲಕ್ಷ್ಮಿ ಜೂನಿಯರ್ ಕಾಲೇಜ್ ಪರಂಬುಲ್ 14ನೇ ಕಾಲತ್ ಅಡ್ಡೆಂಗಡ ಕಘ್ ಕ್ರಿಕೆಟ್ ಕಳೆ ನಮ್ಮ ವಿಪ್ರಿಲ್ 22 ಲಿಂಜಿ ನಡಪದುಂಡ್.

**ಚುಟುಕ:**

**ಮುಮ್ಮೂಂದ್ ಮಕ್ಕ**  
ಇಕ್ಕಿಕ್ಕಿ ಆಯಿಂಡುಂಡ್ ಕೊಡವಡ ಜನ ಸಂಖ್ಯೆ ಕಮ್ಮಿ ಪೊಮ್ಮಕ್ಕ ಅಂಡು ಮಿಂಞಕ್ ಮುಮ್ಮೂಂದ್ ಮಕ್ಕಡ ಮಮ್ಮಿ! ಕೊಡವತಿ ಪೊಡಿಯ ಕೊಡವ ಸಮಾರಂಭತ್ ಪೊಮ್ಮಕ್ಕರ್ ಚಾಯಿ ಕೊಡವತಿ ಪೊಡಿಯ ಇಲ್ಲೇಂಗಿ ಅವ ಸಮಾರಂಭತ್ ತೇಟಿಕ್ ಬುದ್ಧ ಬಡಿಯಿ..!  
**ನಂಬಿಯಪಂಡ ರಂಜು ನಾಣಯ್ಯ**  
ದಾಸರಳ್ಳಿ, ಬೆಂಗಳೂರ್

**ಪೊಂಬೊಳಕ್**

ಬೆಂಗಳೂರ್ ಕೊಡವ ಸಮಾಜತ್ ತಿಂಗೋಡಿ ಪತ್ರಿಕೆ ಏಪ್ರಿಲ್ 2013 ಕಾಲ-9: ಸಂಚಿಕೆ-8 ಎಲ್ಲಾ ಹಕ್ಕುನ ಕಾತ್ ಬೆಚ್ಚತ್.

**ಪೊಂಬೊಳಕ್ ಸಂಪಾದಕ ಮಂಡಳಿ ಸಂಪಾದಕ ಪಳಂಗಂಡ ಕೆ. ಚಂಗಪ್ಪ**

ಸಹ ಸಂಪಾದಕಂಗ ಕೇಕಡ ಎಸ್. ಚಂಗಪ್ಪ ನಂಬಿಯಪಂಡ ಜಿ. ರಂಜು ನಾಣಯ್ಯ

ಬಲ್ಲಡಿಚಂಡ ಎ. ಮಾಚಯ್ಯ ಖಜಾಂಚಿ, ಕೊಡವ ಸಮಾಜ

ಮುದ್ರಕ-ಪ್ರಕಾಶಕಂಗ ಚೇನಂಡ ಎ. ಮಾದಪ್ಪ ಕಾರ್ಯದರ್ಶಿ, ಕೊಡವ ಸಮಾಜ ಮುದ್ರಣ

ಕಾವೇರಿ ಎಂಟರ್‌ಪ್ರೈಸಸ್ #18, 8ನೇ ಮುಖ್ಯರಸ್ತೆ, 8ನೇಕ್ರಾಸ್, ಸಂಪಂಗಿರಾಮನಗರ, ಬೆಂಗಳೂರ್-560027 ಫೋನ್: 22128682, 9844081382

ಪೊಂಬೊಳಕ್ ಪತ್ರಿಕೆ ಸುದ್ದಿ, ಲೇಖನ, ಜಾಹೀರಾತ್ ಅಯಪಕ್ ವಿಳಾಸ:

ಕಾರ್ಯದರ್ಶಿ/ಸಂಪಾದಕ ಪೊಂಬೊಳಕ್ ಪತ್ರಿಕೆ ಕೊಡವ ಸಮಾಜ ಬೆಂಗಳೂರ್ ನಂ 7, 1ನೇ ಮುಖ್ಯರಸ್ತೆ, ವಸಂತನಗರ ಬೆಂಗಳೂರ್-560052 kodavasamajbl@gmail.com

**ಪೊಂಬೊಳಕ್ ಪತ್ರಿಕೆರ ಜಾಹೀರಾತ್ ರೇಟ್ ಔವರ**

ಮಲ್ಟಿ ಕಲರ್ ಪ್ರಿಂಟ್ :

ಬೆಂಬರಿ ಕವರ್ ಒರ್ ಪಾಳೆ : 20,000/-ಉ.  
 ಬೆಂಬರಿ ಕವರ್ ಅರ್ ಪಾಳೆ : 10,000/-ಉ.  
 ಬೆಂಬರಿ ಕವರ್ ಕಾಲ್ ಪಾಳೆ : 5,000/-ಉ.  
 ಬೆಂಬರಿ ಕವರ್ ಒಳ್ ಪಾಳೆ : 15,000/-ಉ.  
 ಬೆಂಬರಿ ಕವರ್ ಒಳ್ ಅರ್ ಪಾಳೆ : 7,500/-ಉ.

ಕರಪು-ಬೊಳಪು  
**White & Black** ಪ್ರಿಂಟ್  
 ಒಳ್ ಒರ್ ಪಾಳೆ : 6000/-ಉ.  
 ಒಳ್ ಅರ್ ಪಾಳೆ : 3000/-ಉ.  
 ಒಳ್ ಕಾಲ್ ಪಾಳೆ : 1500/-ಉ.  
 ಕನ್ನಿಪ್ಪ 9 ಸೆ.ಮೀ x 2 ಕಾಲಂ : 500/-ಉ  
 ಜಾಹೀರಾತ್ ಪಣತನ ಸಮಾಜಕ್ ಎತ್ಚೆಚೆಡು.

ಸಂಪಾದಕೀಯ...

**ಕೊಡವ ಮಕ್ಕ ಒಂದಾಯಿತಿರಂಡು**

ಇಂದೇತ ನಂಗಡ ಮಕ್ಕ ನಾಳೆತ ಜನಾಂಗ. ಕೊಡವ ಜನಾಂಗತರ ಜನಸಂಖ್ಯೆ ಪೊಂದಾವಂಡ ಬದಲ್ ತಾಂದಂಡುಳ್ಳದ್, ಕೊಡವ ತಕ್ಕ ಕ್ರಮೇಣ ಬರಿಕಾಯಂಡ್ ಪೋಯಂಡುಳ್ಳದ್, ನಂಗಡಲ್ಲಿಯೇ ಸರಿಯಾನ ಒಗ್ಗಟ್ಟ್ ಒತ್ತೋಮೆರ್ ಕೊರತೆಕ್ ಕಾರಣ ಆಯಂಡುಳ್ಳಾನ ನೋಟಾನಕ ಮಿಂಚ್ ಜನಾಂಗ, ಭಾಷೆ, ಸಂಸ್ಕೃತಿರ ಭವಿಷ್ಯ ಕಷ್ಟಾಂಡ್ ಎಣ್ಣೆತೆ ವಿಧಿ ಇಲ್ಲೆ. ಮಧ್ಯಮ ಬಯತ್ ಕಾರ, ಪರಿಯವು ಎಣ್ಣೆತ್ ಚೆನ್ನ ಜನಕ್ ಮಾತ್ರ ಕೊಡವ ತಕ್ಕ, ಸಾಹಿತ್ಯ ಅವಶ್ಯ, ಬಾಕಿ ಉಳ್ಳ ಮಕ್ಕ ಮರಿಯ, ವಿದ್ಯಾವಂತಂಗ ಇಂಗ್ಲೀಷ್ ಭಾಷೆರ ಪುಡಾತತ್ ಪೋಯಂಡುಂಡ್. ಬದ್‌ಕವಕ್ ನಂಗಕ್ ಬೋರೆ ಎಲ್ಲಾ ಭಾಷೆರ ಅವಶ್ಯಕತೆ ಖಂಡಿತಾ ಉಂಡ್. ಆಚೇಂಗಿ ಅವ್ ತಕ್ಕ, ಪುಟ್ಟನ ಸಂಸ್ಕೃತಿನ ಬೊಳತಂಡೂಂಡ್ ಗೇನ ಮಾಡುವದೂ ಇಂದ್ ಮುಖ್ಯ ಆಯಿಪೋಯಿತ್.

ಈ ನೌಟ್ಲಲ್ ಕೊಡವ ಮಕ್ಕ ಕೊಡವಾಮರ ಬೊಳಚೆಕ್ ಪೇಚಾಡಂಡು ಎಣ್ಣುವದ್ ನಾಡ ಅಭಿಪ್ರಾಯ. ಇಂದೇತ ಹೈ-ಟೆಕ್ ಸೊಸೈಟಿಲ್, ಓದ್ ಉದ್ಯೋಗ, ಉದ್ಯಮತ್ ಬೋರೆ ಬೋರೆ ಭಾಷೆರ ಕೂಡೆ ನಂಗಡ ಭಾಷೆನ ಬೊಳತುವಕ್ ನಲ್ಲ ಅವಕಾಶ ಉಂಡ್. ಮಕ್ಕ ಮೊಬೈಲ್, ಇಂಟರ್‌ನೆಟ್, ವೆಬ್‌ಸೈಟ್‌ಲ್ ಕೊಡವಾಮರ ಬಗ್ಗೆ ಜಾಗೃತಿ ಮಾಡ್ಕ ಇಳಿಯಲು. ಫೇಸ್‌ಬುಕ್, ಟ್ವಿಟರ್‌ಲ್ ಕೊಡವಡ ಭೇರ್ಯೆಗ್‌ತನ ಕೊಂಡಾಡಲು. ಮಕ್ಕ ಓದ್‌ನ ಇಂಗ್ಲೀಷ್ ಭಾಷೆಲ್ ಇಕ್ಕ ತಕ್ಕ ಪರವಾನ ಜಾಸ್ತಿ ಮಾಡಿಯಂಡ್ ಕೊಡವ ತಕ್ಕ ಪರವಕ್ ಮಡಿಪ ಕಾಲ ಬಂದೆತಿತ್. ಕೊಡವ-ಕೊಡವ ಮಕ್ಕ ಕೂಡ್‌ನಲ್ಲಿಯೂ ಕೊಡವ ತಕ್ಕ ಪರವಕ್ ಮಾನಕೇಡ್ ಆಯಂಡುಂಡ್. ಕೊಡವಡ ಕೂಡೆ ಕೂಡಿಯಾಡುವಕ್, ಕೊಡವ ಸಭೆ ಸಮಾರಂಭಕ್ ಬಪ್ಪಕ್ ಅದಚ್ಚಕೂಲಿ ಮಕ್ಕ ಬಯ್ಯಕ್ ನಿಪ್ಪೂಡ ಕಾಂಬ! ಅಪ್ಪವಂಗಳೂ ಸುಮಾರ್ ಹೈ-ಲೆವೆಲ್ ಮಕ್ಕ, ಸಿನೇತಂಗಡ ಕೂಡೆ ಕೂಡಾವಕ್ ಒತ್ತಾಸೆ ಕಾಟುವ. ಆಚೇಂಗಿ ಕೊಡವಡ ನಮ್ಮ ನಾಳ್, ಸಭೆ-ಸಮಾರಂಭ ಇಂಜಕ ಮಕ್ಕಳ ಅಲ್ಲಿಕ್ ಅಯಿಪದೇ ಇಲ್ಲೆ.

ಇನ್ನನೆ ಪಣಕಾಸ್, ಅನುಕೂಲಕೊತ, ಪಣಕಾರ-ಗರೀಬ ಎಣ್ಣುವ ಮಟ್ಟತ್ ಪೋಪಕ ಮಕ್ಕ ಕೊಡವಾಮರ ಅವಶ್ಯಕತೆ ಇಲ್ಲೆಂಡ್ ಗೇನ ಮಾಡುವಕೂ. ನಾಳೆಕ್ ಈ ಜನಾಂಗಕ್ ಭಾಗ್ಯ-ಬಕ್ತತ್ ಇಪ್ಪಕೆಲ್ಲೆಂದೂ ನಂಬುವಕ್ ಆಸ್ತ ಉಂಡ್. ಈ ಮಕ್ಕ ಅಲ್ಲಿಂಚಿ ಬೋರೆ ಜನಾಂಗತರ ಸಂಬಂಧತ್ ಪೋಪಕೂ ಮೊಳಿಯಾಯಂಡ್ ಉಂಡ್‌ಂದ್ ಎಣ್ಣಲು. ಅಭಿಮಾನ ಉಳ್ಳ ಕೆಲವು ಮಕ್ಕ ನಂಗಕ್ ಕೊಡಗಲ್ ಆಸ್ತಿ ಇರಂಡು. ಇಲ್ಲೇಂಗಿ ಒರ್ ಮನೆ ಬೋಂಡು.. ಎಣ್ಣುವ ಇರಾದೆನ ಕಾಟಿಯಂಡಿಪ್ಪ, ಓದಿತ್, ಚಾಕ್ರಿ ಮಾಡಿತ್ ಕೊಡಗಲ್ ಆಸ್ತಿ ಎಡ್‌ಪಕೂ, ಅಲ್ಲಿಯೋರ್ ಮನೆ ಕಟ್ಟುವಕೂ ಮಿಂಚ್‌ಕ್ ಬಂದಂಡುಂಡ್. ಇನ್ನನಿಪ್ಪಕ ಎಲ್ಲಾ ಮಕ್ಕಳೂ ಪರಸ್ಪರ ಕೊಡವ ಮಕ್ಕಡ ಪರಿಚಯ ಮಾಡಿಯೋಂಡು. ಕೊಡವ ಮಕ್ಕಡ ಭದ್ರತೆಕ್, ನಮ್ಮದಿಲ್ ಬಾಳವಕ್ ಇದ್‌ನುಂಡ್ ಸಾಧ್ಯ ಆಪ. ಕೊಡವ-ಕೊಡವ ಎಣ್ಣುವ ಬ್ರಾಂಡ್ ಪದ ಇಂಜಕ ಕೊಡಗರ್ ಪೊರ್ಮ ಇಪ್ಪ ಎಲ್ಲಾ ಮಕ್ಕಕ್ ನಲ್ಲ ಮಾರ್ಗದರ್ಶನ ಕಾಟ್ಪವ. ಪರಸ್ಪರ ಓದುವಕೂ, ಚಾಕ್ರಿಲ್ ಕೂಡುವಕೂ, ಕಷ್ಟ-ಸುಖತ್ ಪರಸ್ಪರ ಕುಸಿಲ್ ಇಪ್ಪಕೂ ಸಾಧ್ಯ ಉಂಡ್. ಬಯತ್ ಕಾಲತ್ ಅಪ್ಪವನ ನೋಟಿಯಂಡ್ ಕೊಡಗಲ್ ಇರಲು.

ಕಾಲ ಮರಾಂಜಿತ್ ಪಣಕಾಸ್, ಬಲ್ಲರಿಕೆಲ್ ಮಾತ್ರ ಬದ್‌ಕ್ ಎಣ್ಣುವಕ್ ಕಯ್ಯುವದಿಲ್ಲೆ. ನಂಗ-ನಂಗ ಒಗ್ಗಟ್ಟಲ್ ಚಾಯಿಲ್ ಕೂಡವನ್ನಕೆ ಆಕಂಡು. ಪರಸ್ಪರ ನಲ್ಲಾಂಗ್-ಕೆಪ್ಪಾಂಗ್ ಕೂಡಿ ಬಾಳವ ಒತ್ತೋಮೆರ್ ಬೆಚ್ಚವಂಡು. ನಗರ ಬದ್‌ಕ್‌ಲ್ ಸುಮಾರ್ ಜನಾಂಗಕಾರ ತಂಗಡದೇ ಆನ ಜಾತಿ ಗುಂಪುನ ಬಲಪಡಿಯಂಡ್ ಪೋಪ. ಕೊಡವ ಉಳ್ಳವು ದೂರ-ದೂರ ಆಯಂಡ್ ಪೋಪಾನ ತಡ್‌ಕಂಡು. ಕೊಡವ ಸಮಾಜ, ಕೊಡವ ಸಂಘತ್.. ಕೂಡವದೂ ಬೋಂಡು. ಚಾಕ್ರಿ, ಬಿಜಿನೆಸ್, ಓದ್ ಎಲ್ಲಾ ಕಡೆ ಕೊಡವ ಮಕ್ಕ ತಂಗಡ ಭದ್ರತೆ, ಭವಿಷ್ಯಕಾಯಿತ್ ಏರ ಕೊಡವ ಮಕ್ಕಳ ಪರಿಚಯ ಮಾಡಿಯೋಂಡು. ಕೊಡವ ಜನಾಂಗತರ ಯುವಜನಾಂಗ ಒಂದಾನಕ ಪರಿಯವು ಸಹ ಕ್ರಮೇಣ ಒಂದಾನನ್ನಕೆ. ಮಕ್ಕ ಮನಸ್ ಮಾಡಿತ್ ಕೊಡಗಲ್‌ನ ನೆಲೆ ಬೋಂಡೂಂಡ್ ಗೇನ ಮಾಡಾನಕ ಪರಿಯವು ಅದಂಗೂ ಮನಸ್ ಮಾಡಂಡು. ಕಾವೇರಿ-ಇಗ್ಗುತಪ್ಪಂಡ ಮಣ್ಣಲ್ ಪುಟ್ಟನ ನಂಗ ಎಚ್ಚಕೇ ದೂರ ಪೋನಕೋ ಕೊಡಗಲ್ ಕಾಟ್ಪವಚ್ಚಕ್ ನೆಮ್ಮದಿರ ಬದ್‌ಕ್ ಎಲ್ಲಿಯೂ ಕಾಟ್ಪವಕಿಲ್ಲೆ. ಎಲ್ಲಿಯೇ ಇಂಡಕೋ ಒಗ್ಗಟ್ಟ್ ಕೊಡವಳಾಯಿತ್, ಕೊಡಗಲ್ ಮಣ್ಣ್ ಮನೆ ನೇಡಿತ್, ನಾಡ್-ನಗರ-ದೇಶತ್ ಎಲಂಗುವಕ್ ಮಕ್ಕ ಮಿಂಚ್‌ಕ್ ಬರಂಡು. ಎಲ್ಲಾರೂ ಕೊಡವಾಮರ ನಳತ್ ಚಾಯಿಲ್ ಬಾಳಿ ಬೊಳಂದಕ ಕೊಡವ ಚೆನ್ನ ಉಳ್ಳವ. ಇಲ್ಲೇಂಗಿ ನಂಗಡ ಜನಾಂಗ ಕಾಂಗತಾಕು..!

ಪಳಂಗಂಡ ಕೆ. ಚಂಗಪ್ಪ ಸಂಪಾದಕ

ಇಮೇಲ್ : pombolak@gmail.com

**ಜಯ ಸ್ಮರಣೆ**



ಜಬ್ಬೂಮಿರ ಮೀದಲ್ ಬಾಂಗೊಡ್ ಕೋವುಲ್ ಕಾವೇರಮರ ತೀರ್ಥತ್ ಮಕ್ಕ ಸಾರ್ಥಕವುರ ಕೊಂಡೋಲ ಪರಮಲ್ ಪಾಕುಂಚ್ ನೇಡಿತ್ ಜಯಲಕ್ಕಿ ಪದಗೊಂಡ್ ಗುರುಕಾರಿಗೊಂಡ ಕೊಂಡೋಲ ಪೊಲಂಡ್ ಇತಿಹಾಸ ವಿದ್ಯಾ ಪಡ್‌ಚೋರೆ ಸರಸ್ವತಿ ಮಂಡ ತೇಂಡಿ ನೆಂದಲ್ಲಿ

ಮಂಡೀರ ಒಕ್ಕತ್ ಅಪ್ಪಣ್ಣ ಬೈಂಬ ಕೈ ಪುಡ್‌ಚಿ ಎಪ್ಪಿತ್ ಮನೆ ಮೊಟ್ಟ ಮರಾಂಜಿತ್ ಕೊಡವ ಸಾಹಿತ್ಯಾ ಚಿಗ್‌ರಡ್‌ತ್ ಬೀಂಗೋಲೆ ಎಳ್‌ಚಿ ನಾಟಕ ಆರ್ ಕತೆ ಮೊತ್ತೆ ಎಚ್ಚ ಕವನ ಕೃತಿಂಚಿ ಮೂಂಡ್ ನಮ್ಮ ಕೊಂಡಿತ್ ಟ್ರಿಯಾ ಚೀಫ್ ನೊರಾತ್ ಚೆಂಡೋಟ್ ಉರಾಂಡಿತ್ ಪಾಟ್ ಪೊಟ್ಟಿ ಅಂಜಿಲ್ ಶ್ರೀ ಕೃಷ್ಣನ ಪಾಡಿತ್ ರೈಯೆಕಾರ ಜಯ ಕೂಟತ್ ನೆಲ್ಲಿಗೆ ಆಯಿರ ಕೊಯಿತ್ ಪಡಂದೋರ್ ಭಾಗ್ಯತ್ ಪೂಜೆಂಡ್ ಬೆಚ್ಚತ್ ಕಾಕಿ ಕೂಟಿ ಕೊಂಡಾಡಿ ಪೂಜೊಪ್ಪೆ ತೇಂಡಿತ್ ಪುರಾಡ್ ಎಲ್‌ಂಗಿ ಕನತ್ ನಿಂದಲ್ಲಿ ಕೈಲೊಂದು ಆಕತೆ ಕೆಲಪಿರಾಂಚಿ ಮರಿಯಣೆ ಚಿದಿಯಂಗ ಕಳಕಾಂಚಿ ತೆಳಚೋಲೆ

ಶ್ರೀ ಕೃಷ್ಣ ಪೂಗೊಂಡ್ ಎದಾಪ್ ತಾ ನಿಂದಲ್ಲಿ ಪನ್ನೇರಂಡ್ ಕಾಲತ್ ಪದನಟ್ಟ್ ನಟ್ಟನ ತೇಂಡಿ ಎಳ್ಳಿತ್ ಕೊಂಡೋಲೆ ಕೊಡಮಾಲೆ ಮೊಟ್ಟಾಂಚಿ ಮೊಟ್ಟಕ್ ಮೊಟ್ಟಡತ್ ನಿಕ್ಕಣೆ ತೆಂಗಣ್ಣ್ ಪೋಲೆ ಕೊಡವ ಕನ್ನಡ ಆಂಗ್ಲ ಅಕ್ಷರತ್ ಸಾಹಿತ್ಯಾ ಬೇಲ್ ಕೋರ್ ಕೊಡಿ ನಂಗಡ ತಕ್ಕಲ್ ಒರ್ ಮಹಾ ಕಾವ್ಯ ಚರಿತ್ರಲೇ ಅದಾ ಸಾಹಿತ್ಯಾ ಎಲ್‌ಂಗಿ ನಿಂದತ್ ಕೊಡಿ ಕೊಡಿಕೆ ಕೊಡವಾಮಲ್ ಜಬ್ಬೂಮಿರ ಮೀದಲ್ ಬೀಂದ ಪೂವಲ್ಲ ಪೊಲಂಚಿ ಒಲಿಯಣೆ ಶ್ರೀಕೃಷ್ಣ ಕೊಡಿಗೊಂಡ್ ಕೂಟಾಳಿ ಕೇವನ ತೇಂಡಿ ಸಾಹಿತ್ಯಾ ಕೇಳಿಲ್ ಬಿರ್ಚ ಪಲ್‌ಂಬ್ ಮಡ್‌ಕತೆ ಪಿರಾಂಜಿಯ ಜಬ್ಬೂಮಿರ ಮಡಲ್ ಸಾಹಿತ್ಯಾ ಪೊಲಂಗೊತ್ತಿ ಮಾಜತ್ತಿರಡ್ ಆ ಅಕ್ಷರ ಮಾಲೆಲ್ ಆ ನೀಡ ತೆಳಿ ಮೂಡ್.

-ಕೇಕಡ ಎಸ್. ಚಂಗಪ್ಪ ರಾಮೂರ್ತಿನಗರ, ಬೆಂಗಳೂರ್

**ದಂಡ್ ತಕ್ಕ**

- ಬದ್‌ಕ್‌ಲ್ ಬಪ್ಪ ಪ್ರತಿಯೋರ್ ಕಷ್ಟ-ನಷ್ಟ ನಂಗಕೋಲ್ ಕೊದಿಮೊದ ಕಾಟ್ಪನನ್ನಕೆ. ಅದ್ ಬದ್‌ಕ್‌ಲ್ ಗ್ಯಾನ ಮಾಡ್‌ನಾಂಗಿಂಚಿ ಜಾಸ್ತಿ ನಲ್ಲದ್ ಮಾಡ್‌ವ. ಎಕ್ಕಲೂ ತೊಂದರೆ-ತಾಪತ್ ಬಂದಕೆ ಬೊತ್ತಿತಿ.
- ಪೊಲಾಕ ನೇರ್ತ್ ಎದ್ದಿತ್ ವ್ಯಾಯಾಮ ಮಾಡ್‌ವದೋ, ಏದೇಂಗಿ ಕಳಿ ಕಳಿಪದೋ ಮಾಡ್‌ನಕ ತಡಿಕ್ ಏರ ಶಕ್ತಿ ಕೂಡ್‌ವ.

**Cook 'n' Serve**  
**ಕುಕ್ ಅಂಡ್ ಸರ್ವೆ**  
 ಕೇಟರಿಂಗ್ ಸ್ಟೆಪ್‌ಅಪ್ಪಿ ವೆಜಿ-ನಾನ್ ವೆಜಿ  
**SAFE TOURS & TRAVELS**  
**ಸೇಫ್ ಟೂರ್ಸ್ ಅಂಡ್ ಟ್ರಾವೆಲ್ಸ್**  
 ಸುಖ ಪ್ರಯಾಣಕ್ ನಲ್ಲ ವಾಹನ ಸೌಕರ್ಯ ತಪ್ಪ  
 ಮೊಕೇಲಿರ ಕೆ. ಶ್ರಣ್ಣಿ  
 Dommalur, Bangalore.  
 ಮೊಬೈಲ್: 9449636065/9731315787  
 E mail: cooknserve.blr@gmail.com

# ಚಲಿತ್ತೆರ ಹಾಳಿಲ್ ಕೊಡವ-ಕೊಡವತಿಯ

- ಚೇಂದ್ರವಾಡ ಗ. ಮುತ್ತಪ್ಪ, ಪೊನ್ನಂಪೇಟೆ.

ಕನ್ನಂಡ ದೊಡ್ಡಯ್ಯ ಪಿಂಞ ಅಪ್ಪಚ್ಚಿರ ಮಂದಣ್ಣ:

ಚಿಕ್ಕ ವೀರಪ್ಪ ಒಡೆಯಂಡ ಕಾಲ. 1736-1766. ಚಿಕ್ಕ ವೀರಪ್ಪ ಚೆರಪತಿಂಜೇ ಸೆರಮನೆ-ಲಿಂಜವು. ಕೂಟಕ್ ಅಯಿಂಡ ಆರೋಗ್ಯ ಸೆರಿ ಇಂಜಿಲೆ. ಇವು ಕೊಡಗನ ಆಳಿಯಂಡಿಪ್ಪಕ ವೈಸೂರ್ ರಾಜಂಡ ಪವ್ವಚ್ಚಿದಾರ (ಸಿಪಾಯಿ) ಹೈದರಾಲಿ ತಾಂಡ ಸಾಮರ್ಥ್ಯ ಶಕ್ತಿಲ್ ಪಟ್ಟಾಳಕಾರ ಅಧಿಕಾರಿ ಎಣ್ಣೆಕ ಕಾರ್ಯಕಾರನಾಚಿ. ಅಕ್ಕ ಚಿಕ್ಕ ಕೃಷ್ಣರಾಜ ಒಡೆಯರ್ ಮೈಸೂರ್ ರಾಜ. ಹೈದರಾಲಿ ಕಾರ್ಯಕಾರನಾನದು ಶ್ರೀರಂಗ-ಪಟ್ಟಣ ಕೋಟೆನ ಅಂಡ ತಾಜಿಕ್ ಎಡಂಡತ್. ಇದಾ-ಯಿತ್ ಚೆನ್ನಂಗೇ ಸಮಯಿತ್ ಮೈಸೂರ್ ಶ್ರೀ ಕೃಷ್ಣರಾಜ ಒಡೆಯರ್ನ ಚೋಪಚಿಟ್ಟತ್ ಅವನ ಜೈಲ್ಕ್ ಕೂಟಚಿ. 1766ಲ್ ಅವಂಡ ಕುಟುಂಬ-ಕಾರಳಿಲ್ಯ ಜೈಲ್ಕ್ ಪಟ್ಟತ್ ತಾನೇ ನವಾಬ್ ಹೈದರಾಲಿಖಾನ್ ಬಹಾದ್ದೂರ್ ಆಚಿ.

ಹೈದರಾಲಿಕ್ ಕೊಡಗ್ ರಾಜನಾಪಕ್ ಇಪ್ಪ. ಚಿಕ್ಕ ವೀರಪ್ಪ ಕಾಯಿಲಕಾರನಾಯಿತ್ 1766ಕ್ ಕಣ್ಣ್ ಮುಚ್ಚಚಿ. ಅವಂಗ್ ಮಕ್ಕ ಇಲ್ಲತಾಂಗ್ ದೊಡ್ಡ ವೀರಪ್ಪ ಎಳೆಯ ತಮ್ಮಣಂಗ್ ದಂಡಾಳ್ ಹಾಲೇರಿ ಮುದ್ದು ರಾಜ. ಹೊರವುಲೆ ನಂದರಾಜ ದಂಡಾಳ್ ಒಂದಾಯಿತ್ ಕೊಡಗ್ ಒಕ್ಕಾಮ್, ತಕ್ಕಾಮನ ಕೈಕ್ ಎಡ್ಡಂಡ್ ಪೆರ್ತ್ ಚಾಯೋಡ ನಡಚಿ. 1766-70ಲ್ ಈ ದಂಡಾಳ್ ರಾಜ್ಯಬಾರ ಕಾಲತ್ ಹೈದರಾಲಿ ಕೊಡಗನ ತಾಂಡ ತಾಜಿಕ್-ತವಣ್ಣಯಿತ್ ತಾಂಡ ಕಾರ್ಯ-ಕಾರ ಫಜರುಲ್ಯಾ ಖಾನ್ನ ಮದಮದೀಯಡ ಪಟ್ಟಾಳ ಸಮೇತ ಅಯಿಚತ್.

ಮುದ್ದು ರಾಜ ತಾಂಡ ತಮ್ಮಣನಾಜೆ ಲಿಂಗರಾಜೇಂದ್ರ ಒಡೆಯರ್ನೋ, ದಳವಾಯಿ (ಕಾರ್ಯಕಾರ) ಕನ್ನಂಡ ದೊಡ್ಡಯ್ಯನೋ, ಕಾರ್ಯಕಾರ ಅಪ್ಪಚ್ಚಿರ ಮಂದಣ್ಣನೋ ಕೂಟಕ್ ಹಾಲೇರಿ ಅರಮನೆಂಜಿ ಏಳ್ ಅಯಿರ ಸೀಮೆಕ್ ಬಂದಿತ್ ಅಲ್ಲಿ ಹೈದರಾಲಿ ಫಜರು-ಲ್ಯಾ ಖಾನ್ನ ಪಟ್ಟಾಳಕಾರದ ಕೂಡ ಪಡೆ ಪೊತ್ತತ್. ಅಪರಿಪುರ ಲತಾಪಟಲ್ ಬಾರೀ ಪೊಯಿ-ತಾಚಿ. ಇನ್ನೆ 3 ಜಾಗತ್ಲ್ ನಡೆಂಡ ಪಡೆಲ್ ಕನ್ನಂಡ ದೊಡ್ಡಯ್ಯನೋ, ಅಪ್ಪಚ್ಚಿರ ಮಂದಣ್ಣನೋ ದಾರ್ ಕೊ ತಡಪಕಯಿತ್ತಾಚಿ. ಫಜರುಲ್ಯಾ ಖಾನ್ ಚೋತಿತ್ ಬಿಸಲೇ ಕುಂದ್ ಇಂಜಿಚತ್ ಓಡಚಿ.

ಕನ್ನಂಡ ದೊಡ್ಡಯ್ಯಂಡ

ಮೂಂದನೆ ಕುರಿರ ಪಡೆ ಶನಿವಾರ ಸಂತೆ ಹೋಬಳಿ ಕಾಜೂರ್ ಪಡೆಲ್ ಫಜರುಲ್ಯಾ ಖಾನ್ ಚೋತತ್. ಆಚೇಂಗಿ ಶತುವಡ ಪೊಯಿತ್ ಗಾಯ ಆನ ವೀರ ಕನ್ನಂಡ ದೊಡ್ಡಯ್ಯ 1767ಲ್ ಮರಣ ಪಟ್ಟತ್. ಅಂದಾಂಜಿ ಕನ್ನಂಡ ದೊಡ್ಡಯ್ಯ ಪಡೆ ಬೀರನಾಚಿ. ಮಡಿಕೇರಿಲ್ ಕನ್ನಂಡ ಒಕ್ಕಕಾರ ದೊಡ್ಡಯ್ಯಂಡ ಕಲ್ತೆರ ಆಳ್ ರೂಪ್ (ಪ್ರತಿಮೆ) ಮಾಡಿತ್. ಇಲ್ಲಿ ಕಾಲಕೊಮ್ಮೆ ದೊಡ್ಡಯ್ಯ ನಮ್ಮ ತೆರ ನಡಪ್. ಕನ್ನಂಡ ಬಾಣ್ ಮಡಿಕೇರಿಲ್ ಇಕ್ಕಲೂ ಉಂಡ್.

ದೊಡ್ಡಯ್ಯ ಚಿತ್ತದು ಲಿಂಗ-ರಾಜಿಂಗ್ ಇಂಜಿಯೆ ಅಪ್ಪಚ್ಚಿರ ಮಂದಣ್ಣ ಕೊಡವಡ ಪಡೆಕೆಳೆನ ಅರಿಂಜ ಹೈದರಾಲಿ ತಾನ್ ಅದವಾಯಿತ್ ಬೆಚ್ಚಂಡಿಂಜ ಕಾರ್ಯಕಾರ ಬೋನಿರ ಚರ-ಮಣ್ಣನ ಬುಡುವ ಗೇನತಿಪ್ಪಕ, ಚರಮಣ್ಣ ಸಿಡುಬು ಕಾಯಿಲತ್ ಶ್ರೀರಂಗಪಟ್ಟಣ ಚತ್ ಪೋಚಿ. ಲಿಂಗ ರಾಜಂಡ್ ಕೂಡ್ ಹೈದರಾಲಿ, ಫಜರುಲ್ಯಾ ಖಾನ್ ಚೋತದು ಒರ್ ಒಪ್ಪಂದಕ್ ಬಾತ್. ಕೊಡಗ್ ರಾಜಂಡ ತಾಜಿಲ್ ಅಮರ ಸುಳ್ಳ ಮಾಗಣೆ ಇಂಜಿತ್. ಆಂಡ ಪಕ್ಕತ್ ಪಂಜ, ಬೆಳ್ಳಾರ್ ಎಣ್ಣುವ ದಂಡ್ ಮಾಗಣೆನ ಕೊಡಗ್ ರಾಜಿಂಗ್ ಒಪ್ಪಚಿಟ್ಟತ್. ಇಕ್ಕ ಕೊಡಗ್ ಅಮರ ಸುಳ್ಳ ಮಾಗಣೆ ಪಿಂಞ ಪಂಜ-ಬೆಳ್ಳಾರ್ ಮಾಗಣೆ ಕೂಡಚಿ. ಇಚ್ಚ ಕಾನದು ಲಿಂಗರಾಜ. ಅಪ್ಪಚ್ಚಿರ ಮಂದಣ್ಣ, ಪಟ್ಟಾಳಕಾರ ಮಡಿಕೇರಿಲ್ ವಾಪಾಸ್ ಬಾತ್. ಇನ್ನೆ ಅಪ್ಪಚ್ಚಿರ ಮಂದಣ್ಣದ ಸಾಹಸ ಕಥೆ ಕೇಳಿ ಪಟ್ಟತ್. ಕನ್ನಂಡ ದೊಡ್ಡಯ್ಯ ಪಿಂಞ ಅಪ್ಪಚ್ಚಿರ ಮಂದಣ್ಣ ಪಡೆ ಬೀರಂಗಳಾಚಿ. ಜನ ಅಯಿನ್ ಕೊಂಡಾಡುವ.

### ಕಾರ್ಯಕಾರ ಕುಲ್ಲೇಟಿರ ಪೊನ್ನಣ್ಣ

1789 ಜೂನ್; ವೀರರಾಜೇಂದ್ರ ಒಡೆಯರ್ ನಾಲ್ ನಾಡ್ ಅರಮನೆಂಜಿ ತಾಂಡ ಕಾರ್ಯಕಾರ ಸುರು ಮಾಡಚಿ. ಕೊಡವಡ ಆಸಿಲಿಂಜ ಇತರ ಜನಾಂಗ (ಮುಸ್ಲಿಮ್) ಕಾರಳ ದೊವುತವಕ್ ಮೊಳಿ ಇಟ್ಟತ್. ಟಿಪ್ಪುರ ತಾಜಿಲಿಂಜ ಕೊಡಗ್ ಬುಡಗಡಕೂ ನೋಟಚಿ. ವೀರರಾಜ ಮುಳ್ಳುಸೋಗ್ ತಾವರೆ ಕೆರೆರ ಪರಂಬುಲ್ ತಾಂಡ ಪಟ್ಟಾಳಕಾರದ ಕೂಡ ಕೂಡಚಿ. ಸುರೂಲ್ ಇನೂರ್ ಕೊಡವಳ ಕುಶಾಲನಗರ ಕೋಟೆನ ಪುಡಿಪಕ್ ಅಯಿಚತ್. ಅವು ಚೋತಿತ್ ವಾಪಾಸ್ ಬಾತ್. ಅಲ್ಲಿಂಜಿ ನಲ್ಲ ಕಾರ್ಯ-ಕಾರನಾಯಿತ್ ಕುಲ್ಲೇಟಿರ ಪೊನ್ನಣ್ಣನ ಕಾಕಚಿಟ್ಟತ್.

ಪೊನ್ನಣ್ಣ ತಾಂಡ ತಮ್ಮಣ್ಣ ಕಾರ್ಯಕಾರ ಮಾಣಿಚ್ಚನೋ ಕೂಟಿಯಂಡತ್.

ಕೋಟೆ ರಾಜ ಮರೆನಾಡ್ ಒಂಜ ಓಡಿ ಪೋಪಕ ಅವನ ಪುಡಿಪಕ್ ಪೋನಾತ್ ಪೊನ್ನಣ್ಣನೂ ಒಬ್ಬೊ ಆ ರಾಜ ಓಡನಕೋ, ಅವಂಡ ಮುಸ್ಲಿಮ್ ನಾಗಯ್ಯನ ಪೊನ್ನಣ್ಣ ಪುಡಿಚಿಬಂದಿಲಿಂಜಿಚತ್. ಅಂತಾ ಶೂರ ಕುಲ್ಲೇಟಿರ ಪೊನ್ನಣ್ಣನ ಕುಶಾಲನಗರ ಕೋಟೆ ಪುಡಿಪಕ್ ಪಟ್ಟಾಳಕಾರ ಕೂಡ ಅಯಿಪ. ಕಾರ್ಯಕಾರ ಮಾಣಿಚ್ಚನೂ ಪೋಪ. ಇವು ಅಲ್ಲಿ ಟಿಪ್ಪುರ ಗುಲಾಮಲಿನ್ ಚೋಪಚಿಡಪ. ಅದಾನದು ದಂಡನೆ ಕುರಿ ಪೊನ್ನಣ್ಣ ಅಯಿಂಡ ಕೋಟೆ ಪಡಿರಲಿಕ್ ಮುತ್ವಪ. ಕುಲ್ಲೇಟಿರ ಪೊನ್ನಣ್ಣಂಡ ಪಡೆ ನಲ್ಲೋಣೆ ಪೇಜಾಡಿತ್, ಕೋಟೆರೊಳಕ್ ನುಗ್ಗಿತ್ ಅಲ್ಲಿ ಇಂಜ ಸುಮಾರ್ ಏಳ್ ನೂರ್ ಜನಳ ಪುಡಿಪಕ್ ನೋಟುವ. ಅವು ತಪ್ಪಚಿಟ್ಟಂಡ್ ಕಾವೇರಿ ಪೋಳ ದಾಟಿತ್ ಓಡುವಕ್ ಪೊನ್ನಣ್ಣಂಡ ಕೂಟಾಳಿಯ ಓಡಿತ್ ಸುಮಾರ್ ಮುನ್ನೂರ್ ಜನಳ ಕೆತ್ತಿ ಕೊಂದತ್. ಬಾಕಿ ನಾನೂರ್ ಜನಳ ದಂಡ್ ಮೈಲ್ ಬೆಳಗುರಿ ಕೆತ್ತಣೆ ದೊವುತಿಂಜಿ-ಂಡ್ ಪೋಯಿತ್ ಒಡಿಕ್ಕಿತ್ ಒಪ್ಪು ಚಿಟ್ಟತ್. ಇದಲ್ ಕೋಟೆಲಿಂಜಿ ಖಿಲ್ಲೇದಾರಂಡ ಮಂಡೇಯೂ ಒಂದ್. ಇದತ್ ಬಾಕಿ ಇನೂರ್ ಜನ ತಪ್ಪು ಚಿಟ್ಟಂಡ್ ಓಡಿ ಪೋಚಿ.

ಕುಶಾಲನಗರ ಕೋಟೆ-ಟಿಪ್ಪುರ ಖಿಲ್ಲೇದಾರಂಡಮಂಡೆನ ವೀರ ಕುಲ್ಲೇಟಿರ ಪೊನ್ನಣ್ಣ ಕೆತ್ತನಾಂಗ್ ಅದನ ಅಂದೇ ಬೈಟ್ ಬೈಜನಳ್ಳಿ ತಾವರೆಕೆರೆ ಪರಂಬುಂಜಿ ಕೊಂಡ ಬಂದಿತ್. ವೀರರಾಜಿಂಜಿ ಕಾಲರಡಿಲ್ ಮಂಡೆನ ಬೆಚ್ಚತ್. ವೀರರಾಜ ಕುಸಿಯಾಯಿತ್ ಆ ಜಾಗತ್ ಒರ್ ಕಲ್ಪನ ನಡಪುಚಿಟ್ಟತ್. ಪೊನ್ನಣ್ಣ ಕುಶಾಲನಗರ ಅರಮನೆನ ಟಿಪ್ಪುರ ಸ್ವಾಧೀನತಾಂಜಿ-ಬಲೆಚಿತ್ ವೀರರಾಜೇಂದ್ರ ಒಡೆಯರ್ ಕೊಡತತ್. ಆ ಪರಂಬುಲ್ ಇಟ್ಟ ಕುಲ್ಲೇಟಿರ ಪೊನ್ನಣ್ಣ-ಕಲ್ ಇಂದ್ ಸುತ್ ಮುತ್ವಪನಕ್ ಬೊರೆ ಕಲ್ಯಾಯತಂಡ್. ಕೊಡವಕ್ ಅದೂರ್ ವೀರ ಸ್ಮಾರಕ.

### ಮಂಡೇಪಂಡ ಅಪ್ಪಯ್ಯ

ಟಿಪ್ಪು ಸುಲ್ತಾನ್ ಕೊಡಗನ ವಶಪಡಿಯೆಂದೆದು ಕುಶಾಲ-ನಗರ ಕೋಟೆ, ಬೆಪ್ಪನಾಡ್ ಕೋಟೆ, ಭಾಗಮಂಡಲ ಕೋಟೆ ಪಿಂಞ ಮಡಿಕೇರಿ ಕೋಟೆನ ಭದ್ರ ಮಾಡಿಯೆಂದ್ ತಾನ್ ಶ್ರೀರಂಗಪಟ್ಟಣಂಜಿ ಆಳ್ಚಿ. ದೊಡ್ಡ ವೀರರಾಜ ಕೊಡಗ್

ಪಟ್ಟಾಳಕಾರಳುಂಡ್ ಕುಶಾಲ-ನಗರ, ಬೆಪ್ಪನಾಡ್, ಭಾಗ-ಮಂಡಲ ಕೋಟೆನ ತಾಂಡ ತಾಜಿಕ್ ಎಡ್ಡಂಡತ್.

ಟಿಪ್ಪುರ ಮಡಿಕೇರಿ ಕೋಟೆನ ಪುಡಿಪದ್ ಸುಲಭ ಆಯಿಂಜಿ-ಲೆ. ಅದಂಗಾಯಿತ್ ವೀರ-ರಾಜೇಂದ್ರ ಒಡೆಯರ್ ಚಂಬೆಬೆಳ್ಳೂರ್ ಕಾರ್ಯಕಾರ ಮಂಡೆಪಂಡ ಅಪ್ಪಯ್ಯ ಪಿಂಞ ನಗರಹಳ್ಳಿ ಪುಟ್ಟೇಗೌಡನ ಗೊತ್ ಮಾಡಚಿ. ಇವು ದಂಡಾಳ್ ನಲ್ಲ ಸಿನೇತಂಗ್ ಮಂಡೆ ಪಂಡ ಅಪ್ಪಯ್ಯ ನಲ್ಲೋಣೆ ಗೇನ ಮಾಡಿತ್ ಭದ್ರ ಮಡಿಕೇರಿ ಕೋಟೆಕ್ ನುಗ್ಗುವ ಬಟ್ಟೆನಲ್ಲಾ ಅಲಂಜಿತ್. ಇಲ್ಲಿಕ್ ತೀನಿ ಸಾಮಾನ್, ತೋಕ್, ಮದ್ದಿ ಎಲ್ಲಾ ಅರಕಲಗೋಡ್ ಕೋಣನೂರ್ಕಾಲೆ ಮಡಿಕೇರಿಕ್ ಬಪ್ಪಾನ ಕೆಂಡ್ ಪುಡಚಿತ್. ರಾಜಂಡ ಮೂಲಕ ಅರಮನೆಕ್ ಬಪ್ಪ ತೀನಿ ಸಾಮನ್ ಇನ್ನತಾನೆಲ್ಲಾ ತಡಪಕ್ ಏರ್ಪಾಡ್ ಮಾಡಚಿ. 1790ಲ್ ಬಪ್ಪ ಬಟ್ಟೆನಲ್ಲಾ ಬಂದ್ ಮಾಡಿತ್ ಟಿಪ್ಪುಕ್ ಆ ದಂಡ ತಾಲ್ಪೂಕರ ಜನೆ ಟಿಪ್ಪುಕ್ ಕಪ್ಪ ಕಾಣೆಕೆ ಕೊಡಕ್ ತನಕ್ ಒಪ್ಪು ಚಿಟ್ಟತ್. ಆ ದಂಡ್ ಪ್ರದೇಶ ಕೊಡಗ್ ರಾಜಂಡ ಅಧೀನ-ಕಾಚಿ.

ಟಿಪ್ಪುರ ಜಾಫರ್ ಕುಲಿ ಬೇಗಂ ಮಡಿಕೇರಿ ಕೋಟೆನ ಬುಟ್ಟು ನಾಲ್ ನಾಡಲ್ ವೀರ-ರಾಜಿಂಜಿ ಶರಣಾಚಿ. ಅಪ್ಪಯ್ಯ ಪಿಂಞ ಪುಟ್ಟೇಗೌಡ್ ಕಾರ್ಯಕಾರ ಐನೂರ್ ಸೀಮೆಕ್ ಪೋಯಿತ್ ಅಲ್ಲಿಂಜಿ ತುರ್ಕಳ ದೊವುತಿತ್ ಮೆಂಜಾಬಾದ್ ತಾಲೂಕಾರ ಚೆನ್ನ ಚೆಲ್ಲೆನ ಪುಡ್ ಚತ್. ಅಲ್ಲಿಂಜಿ ಮಂಜರಾಬಾದ್ ಅರಕರ ಎಣ್ಣುವಲ್ಲಿ ಮಣ್ಣ್ ಕೋಟೆ ಕಟ್ಟಿತ್ ಚೆನ್ನ ಪಟ್ಟಾಳಕಾರಳ ಬೆಚ್ಚೆಂಡ್ ಆ ರಾಜ್ಯಕ್ ನಗರಹಳ್ಳಿ ಪುಟ್ಟೇಗೌಡ ಸರೆದಾರನಾಚಿ. ಮಂಡೆ ಪಂಡ ಅಪ್ಪಯ್ಯ ಆ ಸೀಮೆರ ಎಚ್ಚರ ಎಡ್ಡಂಡ್ ಕೊಡಗ್ ಗಡಿನ್ ಭದ್ರ ಮಾಡಚಿ.

ಕಾರ್ಯಕಾರ ಮಂಡೆ ಪಂಡ ಅಪ್ಪಯ್ಯ ನಗರಹಳ್ಳಿ ಪುಟ್ಟೇಗೌಡ ಮಡಿಕೇರಿ ಕೋಟೆನ ಟಿಪ್ಪುರ ವಶತಾಂಜಿ ಬುಡಿತ್ ಕೊಡಗು ರಾಜಿಂಗ್ ಕೊಡತ್. ಚಂಬೆಬೆಳ್ಳೂರ್ ಅಪ್ಪಯ್ಯ ಮರಣ ಪಟ್ಟತ್. ಸಿನೇತ್ ಪುಟ್ಟೇಗೌಡ ಅಪ್ಪಯ್ಯಂಡ ಗೋರಲಿಂಜಿ ಮಣ್ಣ್ ಕೊಂಡ್ ಪೋಯಿತ್ ಕುಶಾಲನಗರತ್ ಅಪ್ಪಯ್ಯಂಡ ಪದತ್ ಗೋರಿ ಕಟ್ಟಿಚಿ. ಆ ಗೋರಿ ಇಕ್ಕಲೂ ಉಂಡ್.

ಬಾಕಿ ಬಪ್ಪ ಸಂಚಿಕ್ 'ಇತಿಹಾಸತ್ ಪಾಳಿಂಜಿ'

**ಚಂದನತ್ ಕೊಡವ ಸಿರಿ**  
ದೂರದರ್ಶನ ಚಂದನತ್ ಪ್ರತಿ ತಿಂಗಳ 3ನೇ ಚನಿಯಾಚಿ ಪೂಲಾಕ 11.30ಗ್ ಪಿಂಞ ಪಿತ್ಯಾಂಡ್ ನಾರಾಚಿ ಬೈಟಾಪಕ್ 3.30 ಗಂಟೆಕ್ ಕೊಡವ ಸಿರಿ ಕಾರ್ಯಕ್ರಮ ಪ್ರಸಾರಾವ. ಏಪ್ರಿಲ್ ತಿಂಗಳ ಸಾಹಿತಿ ಮಂಡೀರ ಜಯ ಅಪ್ಪಣ್ಣಂಡ ಸ್ಮರಣೆ ಪ್ರಸಾರ ಆಪದುಂಡ್.

**ತೆರಂಗ್ನ ಪೊನ್ನಂಪೇಟೆ ಸ್ಕೂಲ್ ಶತಮಾನೋತ್ಸವ.**  
ಪೊನ್ನಂಪೇಟೆ ಸರ್ಕಾರಿ ಪ್ರಾಥಮಿಕ ಸ್ಕೂಲ್ ರ ನೂರಾಂಡ ನಮ್ಮ (ಶತಮಾನೋತ್ಸವ) ಇದೇ ಏಪ್ರಿಲ್ ತಾ. 7-8ಂಕ್ ನಡಪಕ್ ಏರ್ಪಾಡ್ ಮಾಡಿಂಜಾನ ಇದಿಕ್ ಬಂದ್ ನಾವ್ ಇಂದಾನೆಗಿಂಜಿ ಇದೇ ಜೂನ್ 11-12ಂಕ್ ನಡುವಕ್ ತೀರ್ಮಾನ ಮಾಡಿತ್ ಅಂದ್ ಶತಮಾನೋತ್ಸವ ಸಮಿತಿರ ಕಾರ್ಯಾಧ್ಯಕ್ಷ ಕಾಟಿವಾಡ ಜೆಮ್ಮಿ ಅಣ್ಣಯ್ಯ 'ಪೊಂಬೊಳಕ್' ಕ್ ಅರಿಚಿಟ್ಟತ್.

**ಕೊಡವ ಟೆಲಿಪಿಲ್ ನೇತ್ರಾವತಿ-ಬುಡ್ ಗಡೆ**  
ವೀರಾಜಪೇಟೆರ ಕೊಡವ ಸಾಹಿತ್ಯ ಕಲೆ ಪರಿಷತ್ ಆದನಲ್ 'ನೇತ್ರಾವತಿ' ಎಣ್ಣುವ ಕನ್ನಡತಾಂಜಿ ಕೊಡವಕ್ ಡಬ್ ಮಾಡ್ ನ ಟೆಲಿಪಿಲ್ ಸಿಡಿ ಪಿಂಞ ಡಿವಿಡಿನ ತಾ.1.4.-2013ಂಕ್ ಬೆಂಗಳೂರ್ ಪ್ರೊಕ್ಟಲ್ ಬುಡ್ ಗಡೆ ಮಾಡಚಿ. ಪರಿಷತ್ ಅಧ್ಯಕ್ಷ ಸೋಮ-ಯಂಡ ಬೋನ್ ಬೆಳ್ಳಪ್ಪ ಸಮಿತಿಕಾರ, ಟೆಲಿಪಿಲ್ ನಟಿಂಗ್ ಹಾಜರಿಂಜತ್.

**ಆರೋಗ್ಯ ಉಂಡೇಂಗೊ ಕಾಠಿ ತೋಟಿ ಎಚ್ಚಕೋ ಏಕ್ಟಿ ದುಡ್ಡ ಬಕ್ಕು ಲಕ್ಷಗಟ್ಟಲೆ ತಡಿರ ಆರೋಗ್ಯ ಕೆಲವು ಜನ ಕಾಪಾಡು**  
ಮಿಂಞಕ್ ಕುಡಿಕಂಡಿಯಾಪ ಕಾಫಿ ಇಡತೆ ಸಕ್ಲಿ! ನಂಬಿಯಪಂಡ ರಂಜು ನಾಣಯ್ಯ ದಾಸರಳ್ಳಿ, ಬೆಂಗಳೂರ್

**ಮಡಿವಾಳ ಲೋಪಾಮುದ್ರರ 'ಬೊಳ್ಳು ಚೊಪ್ಪ'**  
ಬೆಂಗಳೂರ್ ಮಡಿವಾಳ ಲೋಪಾಮುದ್ರ ಕೊಡವ ಸಂಘತ್ 25ನೇ ಕಾಲತರ ಪೂಣಿ ನವೆಂ ತಾ. 16.12.2012ಂಕ್ ನಡಂದತ್. ಈಂಡ ಮಾರೀಪತ್ ಬುಡ್ ಗಡೆ ಮಾಡ್ ನ 'ಬೊಳ್ಳು ಚೊಪ್ಪ' ಸ್ಮರಣ ಸಂಚಿಕೆನ 'ಪೊಂಬೊಳ್ಳುಕ್' ಪತ್ರಿಕೆಕ್ ಅಯಿಚಿ ತಂದಿತ್ ವಂದನೆ. ಸ್ಮರಣ ಸಂಚಿಕೆರ ಸಂಪಾದಕ: ಮೆಚ್ಚುವಾಡ ಲಾಲ ಕುಟ್ಟಪ್ಪ; ಸಂಚಾಲಕ: ಬೂವಡಿರ ಎಂ ಬೋಪಣ್ಣ -ಸಂಪಾದಕ.

ತಿಂಗಳ್ ವಿಚಾರ:

# ನೆಲ್ಲಕ್ಕಿ ನಡು ಬಾಡೆ

-ಬಾಚರನಿಯಂಡ ಪಿ.ಅಪ್ಪಣ್ಣ ಪಿಂಜಾ ರಾಜು, ಕುಶಾಲನಗರ.

ಮನುಷ್ಯಂಡ ತಡಿಲ್ ಹೃದಯ ಎಚ್ಚಕ್ ಮುಖ್ಯವೋ ಅನ್ನನ, ಕೊಡವಡ ಬಾಳ್ ಬದ್ಕಲ್ ನೆಲ್ಲಕ್ಕಿ ನಡು ಬಾಡೆ ಮುಖ್ಯ. ಇದ್ ಕೊಡವಕ್ ಮಾತ್ರ ಅಲ್ಲ; ಕೊಡಗರ ಎಲ್ಲಾ ಮೂಲ ನಿವಾಸಿಯಡ ಮನಕೂ ಅನ್ನಯಿ-ಚಿಡಾವ. ಪ್ರತಿಯೋರ್ ಊರ್ ಕ್ ಓರ್ ದೇವ ನೆಲೆ ಇಪ್ಪ. ಆ ಊರ್ ಜನಡ ನೀತಿ ನಡಪುನ ನಿಯಂತ್ರಣ ಮಾಡ್ವ ಕೇಂದ್ರ ಊರ್ ದೇವಸ್ಥಾನ. ಅದೇ ಪೋಲೆ ಓರ್ ಓರ್ ಒಕ್ಕಡ ನಲ್ಲಾಪ್ಪ, ನೀತಿ-ನೇಮ, ಪದ್ಧತಿ ಪರಂಪರೆ, ಆಚಾರ-ವಿಚಾರ, ಧರ್ಮ ಪಿಂಜಾ ಸಂಸ್ಕೃತಿ ನಿಯಂತ್ರಣ ಮಾಡಿತ್ ತಪ್ಪ ಬೆಚ್ಚಿಕ್ ಮೊಟ್ ಇಡತನ್ನಕ್ ಕಾತ್ ರಕ್ಷಣೆ ಮಾಡುವಕ್ ಒಕ್ಕತ್ತಾರ ದೇವ ನೆಲೆ ಈ ನೆಲ್ಲಕ್ಕಿ ನಡು ಬಾಡೆ.

ದೇವಸ್ಥಾನತರ್ ಗರ್ಭಗುಡಿಕ್ ಹಿಂದುವೆ ಎಚ್ಚಕ್ ಮಹತ್ತ್ ಕೊಡಪೋ, ಅಚ್ಚಿಕ್ ಮಹತ್ತ್ ನೆಲ್ಲಕ್ಕಿ ನಡು ಬಾಡೆಕುಂಡ್. ದೇವಸ್ಥಾನತರ್ ಪಾವಿತ್ರತೆ ಕಾಪಾಡುವಕಾಯಿತ್ ಗರ್ಭ-ಗುಡಿಕ್ ಇಷ್ಟ ಬಂದನಕ್ ನುಗ್ಗುವಕ್ಯು. ಅದೇ ತರ ನೆಲ್ಲಕ್ಕಿ ನಡುಬಾಡೆಕ್ ನುಗ್ಗುಂಡಿಕೊ ಪೇರ್ವ ನೇಮ ಉಚಿಡ್.

1. ಪೂರ್ಮ ಊರ್ ಪೋಯಿತ್ ಬಂದಂವ ಕಾಲ್ ಮೂಡ್ ಕತ್ತೆ ಬಾಡೆಕ್ ಬಪ್ಪಕಯ್ಯ.
2. ಕಾಲ್ ಕಾಮೊಟ್ಟಿ ಇಟ್ಟಂಡ್ ಬಾಡೆಕ್ ಬಪ್ಪಕಯ್ಯ; ಮರತರ್ ಕಡಾವು ಬಳಸೋಲ.
3. ಚಾವು ಮನೆಕ್ ಪೋನವು ಇಲ್ಲೆ ಚಾವು ತಾಂಡನವು ಇಟ್ಟ ಬಟ್ಟೆ ಮಾತಿತ್ ಕುಳ್ ಚ ಪಿಂಜಾ ಮಾತ್ ನಡು ಬಾಡೆಕ್ ಕೂಡಂಡು.
4. ದೂರಕ್ ಪ್ರಯಾಣ ಪೋಯಿತ್ ಬಂದವು ಕೇಕಿಯ ಪಡಿ ಕಾಯಿತ್ ಬಾಡೆಕ್ ಕೂಡಂಡು. ಪಡಿ ಕಾಯಿತ್ ನುಗ್ಗಿಟ ಬಾಡೆಕ್ ಬಪ್ಪಕಯ್ಯ.
5. ಕನ್ನಿ ಪೊಲೆ ಕಂಡ ಕನ್ನಿಯಿ ಏಳ್ ದಿನ ನೆಲ್ಲಕ್ಕಿ ಬಾಡೆಕ್ ಬಪ್ಪಕಯ್ಯಾಂಡು. ತಿಂಗಳ ಪೊಲೆ ಕಂಡ ಪೊಮ್ಮು ಮೂಂಡ್ ದಿನ ಕಯ್ಯಣ್ ಪೂರ್ಮ ಇಂಜಂಡ್ ಕುಳ್ ಚಿತ್ ಕೂಡಂಡು ಎಣ್ಣು ದಿನಯಿ ಉಂಡ್.
6. ಕಾರಣಂಗೆ ನೆಲ್ಲಕ್ಕಿಲ್ ಎಡೆ ಬೆಪ್ಪಕ ಕಳ್ ಬೆಪ್ಪುಂಡ್. ಆಚೇಂಗಿ ನೆಲ್ಲಕ್ಕಿಲ್ ದಾದೂ ಕಳ್ ಕುಡಿಪಕಯ್ಯ. ಇಟ್ಟ ಎಡೆ ನೀತಿ ಕಯ್ಯಾಲೆಲ್ ಬಂದಿತ್ ಕಳ್ ಕುಡಿಪಕಲು.
7. ಮಾಡ್ನ ಎರ್ಚಿ ಕರಿನ ನೆಲ್ಲಕ್ಕಿಲ್ ಎಡೆ ಇಡು. ಆಚೇಂಗಿ ನೆಲ್ಲಕ್ಕಿ ಬಾಡೆಲ್ ಕೋಳಿ ಪಂದಿ ಆರತೆರವಕಯ್ಯ. ಪಾಣಿ ಬಲಿ

8. ಪ್ರತಿ ದಿನ ಸೂರ್ಯ ಉದಿಪಾಂಗ್ ಮಿಂಜಾ ಮನೆ ಒಡಕಿತ್ ಚಾಣತ್ ನೀರ್ ತಳ್ ಚಿತ್ ನೆಲ್ಲಕ್ಕಿಲ್ ಬೋಚ ಬೆಕ್ಕುಡು. ಅದೇ ತರ ಅಂದಿ ಮುಂದಿ ನೇರಕ್ ಬಾಡೆ ಮನೆ ಬಿಡಕಿ ತಳ್ ಚಿತ್ ಬೋಚ ಬೆಕ್ಕುಡು.
  9. ನೆಲ್ಲಕ್ಕಿ ಬಾಡೆಲ್ ಬೋಚ ಬೆಪ್ಪದ್ ಎಂದೂ ತಪ್ಪವಕೇ ಕಯ್ಯ ಮನಕಾರ ಎಲ್ಲಾ ದೂರ ಪೋಂಡಿಯ ಸಂದರ್ಭ ಬಂದಕ ಬೋಲೆ ಜನಳ ಮನಲಾಕಿತ್ ಬೋಚ ಬೆಪ್ಪ ಏರ್ಪಾಡ್ ಮಾಡಂಡು. ಇದೋರ್ ನಿತ್ಯ ಪೂಜೆ.
  10. ಅನುಕೂಲ ಸಂಗಡಲ್ಲಿ ಇರುವತ್ತ ನಾಲ್ ಗಂಟೆ ಬೋಚ ಕತ್ತುವ ಏರ್ಪಾಡಿಪ್ಪ. ಎಂತ ಗರೀಬನಾಕಲೂ ಓರ್ ಗೋವು ನೀರ್ ಕುಡಿಪಚ್ಚೆ ನೇರ ನೆಲ್ಲಕ್ಕಿ ಬೋಚ ಕತ್ತಂಡು ಪದ್ಧತಿ ಉಂಡ್.
  11. ನೆಲ್ಲಕ್ಕಿ ಬೋಚ ಕೆಡ್ತಂಡ್ ಎಣ್ಣು ವೆಕ್ಕಾಗ್. ಬೋಚ ಬಿಪ್ಪ ಚಿಡ್; ಬೋಚ ದುಂಡೆಚಿಡ್ ..ಇನ್ನೆ ಎಣ್ಣು.
  12. ನೆಲ್ಲಕ್ಕಿ ಬೋಚ ತನ ಬಾಯಿಲ್ ಉರುಪುವದ್ ಆಗ್. ಓರ್ ಮರತರ್ ಪಾರ್ ಬೆಚ್ಚಂಡ್ ಅದಲ್ ಬೋಚ ನಿಪ್ಪೆಚಿಡ್.
- ಈ ತರತರ್ ನಿಯಮ ಪಾಲನೆ ಮಾಡಿತ್ ನೆಲ್ಲಕ್ಕಿ ಬಡೆರ ಪಾವಿತ್ರತೆ ಕಾಪಾಡ್ ಡು. ಮನೇರ ತಯ್ಯಾಲೆಕತ್ತಣ್ ಬಪ್ಪಕ್ ಬಲ್ಲ ಕಳ್ ನೆಟ್ಟ್ ಇಲ್ಲೆ. ಕಯ್ಯಾಲೆ ಕೆಟ್ಟೋಳೆ ಕೆಡ್ತಂಡು ಕೆಟ್ಟವದೇ ನೆಲ್ಲಕ್ಕಿ ನಡುಬಾಡೆ.
- ನೆಲ್ಲಕ್ಕಿ ನಡು ಬಾಡೆರ ಕೇಕ್ ಮನೊಡಾನ ಕಂವತ್ ಲ್ ಮುಮೂಲೆರ ಎಣ್ಣು ತಿಕ್ಕೋನಾ ಕೃತಿ ಬೋಚ ಕುಂಡ್ನ ಗೋಡೆ ಕೊರಂದಿತ್ ಮಾಡಿತಿಪ್ಪ. ಆ ಗೂಡ್ ಬರಿಲೇ ಕುರಿ ಉಂಡೆ. ತಿರಿ ತುಣಿ ಎಲ್ಲ ಬೆಪ್ಪಕುಳ್ ಮರತರ್ ಕುರಿ ಕುಟ್ಟೆನ್ ಮಟ್ಟ ಬುಟ್ಟುಂಜ ತೂಕಿತಿಪ್ಪ. ಏದ್ ಪತ್ತಂಬರಿಕ್ ಮಾಡ್ನಕ ಅಂಡ್ ಸಾಕ್ ಪಣತನ ಕುರಿ ಕುಟ್ಟಲ್ ಕೆಟ್ಟ ಬೆಕ್ಕುಡು.
- ಈ ನೆಲ್ಲಕ್ಕಿ ನಡು ಬಾಡೆನ ಪಂಡೆಲ್ಲ ಪುತ್ತರಿ ನಮಕ್ ದುಂಬಾ ಅಲಂಕಾರ ಮಾಡುವಂಜತ್. ಪುತ್ತರಿ ಕಯಂಜಿತ್ ಊರ್ ಕಾರ ಮನೆ ಪಾಡಿಯಂಡ್ ಬಂದಿತ್ ನೆಲ್ಲಕ್ಕಿರ ಮಿಂಜಾ ಬೆಚ್ಚಿ ಪಾಚ್ ನ ಬೆಪ್ಪ ಕ್ರಮ. ನೆಲ್ಲಕ್ಕಿನ್ ರಂಗ್ ರಂಗ್ ಮಣ್ಣಲ್ ತೇಚಿತ್ ತಲಾವರಿ ಚಿತ್ತಕಲೆ ಮಾಡ್ನಾನ ನೋಟಿತ್ ಪಾಚ್ ಕಾರ ಇನ್ನೆ ಪಾಡುವಂಜತ್.

- ಅಯ್ಯೋರ್ ತಕ್ಕುಂಡ ನೆಲ್ಲಕ್ಕಿ ಬೋಚ
- ನಾತರ ಮಣ್ಣಲ್ ತೇಕ್ ಪಣಿಯೊ ಸೂರಿಯ ದೇವಂಡ ರೂಪ-ಬರಂದ
- ನೀರ್ ತಾವರ ರೂಪಬರಂದ ನಂದಿಯ ಕಾಳರ ರೂಪಬರಂದ.
- ಇನ್ನೆ ನೆಲ್ಲಕ್ಕಿ ಬಾಡೆರ ತೇಕ್ ಪಣಿರ ಚಾಯಿನ ತುಡಚಿ ಪಾಡುವ.
- ಇಚ್ಚಕ್ ಪಾವಿತ್ರವುಳ್ ನೆಲ್ಲಕ್ಕಿ ನಡುಬಾಡೆ ಕೊಡವಡ ಜೀವನತ್ ಪ್ರತಿಯೋರ್ ಚಟುವಟಿಕೆರ ಕೇಂದ್ರಸ್ತಾನ. ಓರ್ ವ್ಯಕ್ತಿ ಪುಟ್ಟಿತ್ ಚತ್ ಸ್ವಗ್ ಸೇರ್ವಳ್ ಕತ್ತಣ್ ನೆಲ್ಲಕ್ಕಿ ನಡುಬಾಡೆ ದೇವಸ್ಥಾನ ಆಯಿತೂ ನ್ಯಾಯಾಲಯ ಆಯಿತೂ, ಸತ್ಯ ಪ್ರಮಾಣತರ್ ನೀರ್ ನೆಲೆಯಾಯಿತೂ ಇಪ್ಪ. ಕೊಡವ ಸಂಸ್ಕೃತಿ ಪುಟ್ಟುವದೂ ಪಿಂಜಾ ಬೋಳೆ ಬಾವದೂ ನೆಲ್ಲಕ್ಕಿ ಬೋಳೆರ ಬೋಳಿಲೇ ನಡುಬಾಡೆರ ನಡುಲೆ. ಅದ್ ಎನ್ನೆ, ಎಚ್ಚಕ್ ಮಟ್ಟಿಗ್ ನೇರಂಡ್ ನೋಟಿನ:
1. ಕುಂಜಿ ಪುಟ್ಟುವಕ್ ನೆಲ್ಲಕ್ಕಿ ಬೋಳೆಕ್ ಅಕ್ಕಿ ಇಟ್ಟಿತ್ ಆಕಾಶಕ್ ಬೋಡಿ ಬೆಪ್ಪ ಮೂಡಿ ಕುಂಜಿ ಆನಕ್ ತೂಕ್ ಬೋಳೆರದಿಕ್ ತಾಳವೋರಿ ಕೊಟ್ಟುವ.
2. ಕುಂಜಿನ ತೊಟ್ಟಕ್ ಇಡ್ವ-ದು ನೆಲ್ಲಕ್ಕಿಲೇ.
3. ಕುಂಜಿನ ಸುರೂಲ್ ಸೂಲ್ ಕೂಟಂಡಿಕ್ ನೆಲ್ಲಕ್ಕಿ ನಡು ಬಾಡೆಲ್ ಅಕ್ಕಿ ಪರತಿತ್ ಬೆರತ್ 'ಶ್ರೀ' ಅಕ್ಕಿರ ತಿಡ್ಚಿಟ್ಟಿತ್ ಅಯಿಕ್ಕಂಡು.
4. ಕುಂಜಿ ಆಳಾಯಿತ್ ಪಡೆಕ್ ಪೋಂಡಿಕೂ, ವ್ಯಾಪಾರಕ್ ಚೋಮ ಪೋರಿ ಪೋಂಡಿಕೂ, ಸುರೂ ದಿನ ಬೇಲುವಕ್ ಪೋಪಕಲೂ, ಮಂಗಲಾಡಿ ಪೋಪಕಲೂ, ಪೋಣ್ ತೇಡುವಕ್ ಪೋಪಕಲೂ ನೆಲ್ಲಕ್ಕಿಲ್ ಬೋಳೆಕ್ ಅಕ್ಕಿ ಇಟ್ಟಿತ್ ಪೆರಿಯಯಿಂಡ ಕಾಲ್ ಪುಡಚಿತ್ ಪೋಂಡು.
5. ಮಂಗಲ ಕುರಿ ಮಾಡುವಕ್ ಕಣ್ಣಂಡ ಕಡೆಕಾರ ಮೂಡಿರ ಮನೆಕ್ ಬಂದಿತ್ ನೆಲ್ಲಕ್ಕಿಲ್ ಮಂಗಲ ಕುರಿಕಂಡು.
6. ಮಂಗಲಂಡ್ ಬಾಡೆಕ್ ವೇಲ್ ಕಟ್ಟ ಕೆಟ್ಟಂಡು. ಮಂಗಲಕಾರ ನೆಲ್ಲಕ್ಕಿಲ್ ಅಕ್ಕಿ ಇಟ್ಟಿತ್ ಕೊಟ್ಟಿಕ್ಕುಂಡು.
7. ಕಣ್ಣಂಡ ಮೂಡಿರ ದಂಪತಿ ಮುಮೂರ್ತ ನೆಲ್ಲಕ್ಕಿ ಬಾಡೆಲೇ ನಡೆಕಂಡು.
8. ಕಣ್ಣಂಡ ಕಡೆರ ಮಂಗಲ ಬಂದೆದು ಕೂಡಿಂರಾಳ್

ಬಂದಯಿಂಡ ತಕ್ಕಾರ ನೆಲ್ಲಕ್ಕಿಲ್ ನಡೆಕಂಡು. ಕೊಟ್ಟುಂಬಾಟ್ ಬಾಡೆಂಜಿ ಪೊರಡಂಡು. ಬಾಡೆರ ಕೆಟ್ಟೋಳೆ ಕಡಪಾಂಗ್ ಮಿಂಜಾ ಮೂಡಿರ ಬಟ್ಟೆ ತಡಪ ಪದ್ಧತಿ ಆಚಿಡು.

9. ಮಂಗಲಕರ್ತ ನೀರಪಕ್ ಪೋಪಕಲೂ ನೆಲ್ಲಕ್ಕಿಲ್ ಬೋಳೆಕ್ ಅಕ್ಕಿ ಇಟ್ಟಿತ್ ಪೊರಡಂಡು. ನೀರ್ ಕೊಂಡ ಬಂದಾನ ಮುತ್ಯದಂಜ ಉಳ್ ಪಿತ್ ಬೋಳೆರಡಿಲ್ ಬೆಕ್ಕುಂಡು. ಪೊಟ್ಟಿ ನೋಟುವ-ಪದ್ಧತಿ, ಪೊಟ್ಟಿ ದುಂಬು-ಚಿರವದ್, ಪೋಳಿಯ ದುಂಬುಚಿರವದ್ ಎಲ್ಲಾ ನೆಲ್ಲಕ್ಕಿ ವಂಗಳಾಯಿತ್ ಬಂದವ ತಾಮನೆಕ್ ಪೋಪಕಲೂ, ತಾಮನೆಂಜಿ ಬಂದ ಪಿಂಜಾ ನೆಲ್ಲಕ್ಕಿಲ್ ಅಕ್ಕಿ ಇಟ್ಟಿತ್ ಕಾಲ್ ಪುಡಿಕ್ಕಂಡು.

ಅನ್ನೇ ಚಾವುಲೂ ಎಲ್ಲಾ ಕಾಯಿ ನೆಲ್ಲಕ್ಕಿ ಬಾಡೆಲೇ ನಡೆಕಂಡು.

ವ್ಯಕ್ತಿರ ಪಾಣಿ ಪೋಪಾಂಗ್ ಮಿಂಜಾ ಬಾಡೆಕಡೆಕಂಡು. ನೆಲ್ಲಕ್ಕಿ ಬೋಳೆರಡಿಲೇ ಪ್ರಾಣಿ ಪೋಂಡು. ಪೂರ್ಮ ಊರ್-ಲ್ಲೇಂಗಿ ಚಿತ್ತಿತ್ ಕೊಂಡ ಬಂದ ಚಾವುನ ಬಾಡೆಕ್ ಕೂಟುವಕ್. ಇದ್ ನಲ್ಲ ಆರೋಗ್ಯ ನಿಯಮ ಪಾಲನೆ. ಚಾವು ಪಿಂಜಾ ಮಾದತರ್ ಪ್ರತಿಯೋರ್ ಪದ್ಧತಿ ನಡು ಬಾಡೆಲೇ ನಡೆಪ.

ಕೊಡಗರ ಎಲ್ಲಾ ನಮ್ಮ ನಾಳರ ಪದ್ಧತಿ ನಡುಬಾಡೆಲೇ ನಡೆಕಂಡು. ಕೈಲ್ ಪೋಳ್ ಆಯುಧಾ ಪೂಜೆ, ಕಾಮೇರಿ ಚಂಗಾಂದಿಲ್ ಕಣಿ ಪೂಜುವ, ಬಿಸುಲ್ ಕಣಿ ಪೂಜೆ ಮಾಡುವ, ಪುತ್ತರಿ ನಮರ ಎಲ್ಲಾ ಶಾಸ್ತ್ರ ಪದ್ಧತಿಯೊ ನೆಲ್ಲಕ್ಕಿ ನಡು ಬಾಡೆಲೇ ನಡೆಕಂಡು.

ಇದಲ್ಲಾ ಶಾಸ್ತ್ರ ಸಂಪದಾಯಿತ್-ಕಂಜಿ ಮೇಲ್ ಸಂಗತಿ. ಎಣ್ಣಿನಕ್ ನೆಲ್ಲಕ್ಕಿ ನಡುಬಾಡೆ ಕೋಟ್ ಕಚೇರಿ ಪಿಂಜಾ ಪೋಲೀಸ್ ಸ್ಲೇಶನ್ ಕಾರ್ಬಾಲ್ ಮಾಡ್ವದ್. ಇಕ್ಕತ ಮಾದರಿ ಪಂಡ್ ಸಾಧಾರಣ ಮಟ್ಟಿತ್ ಕ್ರಿಮಿನಲ್ ಪಿಂಜಾ ಸಿವಿಲ್ ಕೇಸ್ ಕೋಟ್ ಕಾಡ್, ಸ್ಲೇಷನ್ ಕಾಡ್ ಪೋಪದಿಂಜಿಲೆ. ಒಕ್ಕಡೊಳ್ ಬಂದ ಏದೇ ಪುಂಡ್ ಪುಕಾರಾಡ್ ಒಕ್ಕಡ ನೆಲ್ಲಕ್ಕಿ ನಡುಬಾಡೆಲ್ ತೀರ್ವಾನ ಆಪಂಜತ್.

ಕಳ್ತನ ಮೋಸಗಾರಿಕೆಂತ ಅಪರಾಧ ಮಾಡಿತ್ ಅಪರಾಧಿ ತಾಂಡ ತಪ್ಪನ ಒತ್ತಂಡತೇಂಗಿ ಎಲ್ಲಾರ ಕುಳ್ ಚಿತ್ ನೆಲ್ಲಕ್ಕಿಲ್ ಪುಂಡು. ಒಕ್ಕ ಪೆರಿಯಂವ ಪುಂಡೆ ಮೇಲ್ ನೆಲ್ಲಕ್ಕಿ ಬೋಚಿ-ರೆದಿಕೆ ನಿಂದಿತ್ ದಂಡ್ ಇಂಚ್

ಅಗಲ ಆರ್ ಇಂಚ್ ಉದ್ದತರ್ ಬೋಳೆ ಬಟ್ಟೆನ ನೆಲ್ಲಕ್ಕಿ ಬೋಳೆಕ್ ಅಡ್ಡ ದಂಡ್ ಕೈಲ್ ಪುಡಿಕ್ಕಂಡು. ಅಲ್ಲಿಂಜಿ ತಪ್ಪಡೆಕ್ ಕೆಟ್ಟುಡು.

ಈ ಮನೇ ಆರಂಜತೋ ಅರಿಯತೆಯೋ ಇಂತೋ ವಸ್ತು ಕಾಂಗಾಯಿತ್, ಪಚ್ಚೆ ಮನೇ ಸಂಗ್ ಪದನೇ ಬುದ್ಧಿ ವಿಷಗಲೆ ತಪ್ಪ ಬಂದಿತಿಕ್ಕು, ಆ ತಪ್ಪನ ಅಮೃತ ಗಳೆಲ್ ತಿದ್ದಿ ಸರಿಪಡೆತಿಯವಂಡು. ತಪ್ಪೆ ಮಾಡ್ನಂವ ಅಮೃತ ಇಚ್ಚ ನೆಲ್ಲಕ್ಕಿಲ್ ಬೆಚ್ಚಿಕ್ ಒಪ್ಪಕ್ ಒಯಿಂಬದ್ ಬರೆಕತ್ ಕಾಂಗು. ತಪ್ಪ ಒತ್ತಂಡಲೇಂಗಿ ಅಂತ-ಮಂಡ ಭಾಗ್ ಕುತಿ ನಾಶ ಬಂದಿತ್ ಸಂತಾನ ಮುಡಂಜಿತ್ ಆ ಭಾಗ್ ತುಂಬೆ ತುಂಬೆ ಮೊಳತ್ ಪೋಕುಂಡ್ ಎಚ್ಚರ ಕೊಡಪ್. ತಪ್ಪು ಮಾಡ್ತವು ಎಲ್ಲಾ ಬೋಚಿಕ್ ಅಕ್ಕಿ ಇಟ್ಟಿತ್ ನೆಲ್ಲಕ್ಕಿಲ್ ಅಡ್ಡ ಬೂವ.

ಅಕ್ಕಣೆ ತಪ್ಪಿಸ್ತಂಡ ಮೂಡಲ್ ಬೆವರ್ ಕಾಂಗು. ಮೇಲ್ ಯೋಚಲ್ ಪುಟ್ಟಿಪ್ಪ. ಮನಶಾಸ್ತ್ರ ಪೋಲೆ ಅವಂಡೆ ವರ್ತನೆ ಬದಲಾವ. ಎಂತ ಕಳ್ತನಾಕಲೂ ಬೋಚಿ ತೊಡುವ ದೈಯಂ ಮಾಡುಲೆ. ತಾಂಡ ತಪ್ಪನ ಒತ್ತಂಡ್ ಪೆರಿಯಯಿಂಡ ಕಾಲ್ ಪುಡಿಪ.

ಸಾಧಾರಣ ಕಳ್ತಂಗ ಆನಕ ಪೆರಿಯಯಿ ಅಚ್ಚಕ್ ಮಿಂಜಾಕ್ ಪೋಪದೇ ಇಲ್ಲೆ. ಚೂವಾಚೆ, ಬೋಳಾಚೆ ಮಾತ್ರ ನೆಲ್ಲಕ್ಕಿ ಪ್ರಮಾಣ ನಡಪ ಕ್ರಮ. ಇಂತ ದಿನ ನೆಲ್ಲಕ್ಕಿಲ್ ಸತ್ಯ ಪ್ರಮಾಣ ಉಂಡಂಡ್ ಒಕ್ಕ ಪೆರಿಯಂಗ ಅರಿವಿಕೆ ಕೊಡಪ್. ಕಾಣತಾನ ಮಾಲ್ ದಾರೂ ಕಾಂಗತನ್ನೆ ನೆಲ್ಲಕ್ಕಿರ ಮಿಂಜಾ ಬೆಚ್ಚಿತಿಪ್ಪ.

ಇದೇ ತರ ಕೇಟಂಡ ಪಣ ಸಾಲ, ಅಕ್ಕಿ, ನೆಲ್ ಸಾಲ ಇದಲ್ಲಾ ಸಮಯಕ್ ಸರಿಯಾಯಿತ್ ಬಯ್ಯಕ್ ಕೊಡತ್ ಲೇಂಗಿ ಕೋಟ್ ಕಚೇರಿ ಪತುವ-ದಿಂಜಿಲೆ. ಒಕ್ಕ ಪೆರಿಯಂಗೆ ಎಣ್ಣಿನಕ್ ಮದಿ. ಇಂತ ದಿನ ನೆಲ್ಲಕ್ಕಿಲ್ ಪ್ರಮಾಣ ಉಂಡಂಡ್ ಎಣ್ಣಿನಕ್, ಸಾಲ ವಸೂಲಾತಿ ಆಚೇಂದ್ ಲೆಕ್ಕ.

ಬಾಚೆ 6ನೇ ಪಾಳೆ

**'ಸೋಂಭೋಕಕ್'**  
**ತಿಂಗಳ ಪತ್ರಿಕೆಕ್**  
**ನಿಂಗ ಕಥೆ, ಕವನ,**  
**ವಿಶೇಷ ಎಳ್ಳಿ ಸುದ್ದಿ...**  
**ಇನ್ಯತಾನ ಅಯೆಕಲು.**  
**ಜಾಹೀರಾತ್ ತರೋಲು.**

5ನೇ ಪಾಳೆಂಜ

**ನಲ್ಲಕ್ಕಿ ನಡು ಬಾಡೆ**

ಓರಂದ್ ಹಟಮಾರಿಯ ನಲ್ಲಕ್ಕಿ ಪ್ರಮಾಣಕ್ ಕಾಕನಕ ಬರತೇ ಒಳಪದೂ ಇಂಜತ್. ಇನ್ನನೆ ಮೂಂಡ್ ಕುರಿ ಪ್ರಮಾಣಕ್ ಒಳ್ಳೆ ಚಕ ಅಂತವಂಗೆ ಮನೆಕಾರ ಎಲ್ಲಾ ಕೂಡಿತ್ ಏಪಚಿರುವದ್ ಧರ್ಮ ಸ'ವುತ್. ಇನ್ನ ನಪಂಡ್ ಏಪಚಿಟ್ಟತ್, ಕುತಿ ನಾಶ ಬಂದ ಉದಾಪರಣೆ ಪರ್ತ ಉಂಡ್. ಅದಂಗೆ ಬೊತ್ತಿತ್ ಎಂತ ಹಟಮಾರಿಯೂ ನಲ್ಲಕ್ಕಿ ಬಾಡೆರ ಪ್ರಮಾಣಕ್ ಮಂಡ ತಾಕುವಂಜತ್.

ಅದೇ ಪೋಲೆ ದಾರೆಂಗಿ ನಲ್ಲಕ್ಕಿ ಬೊಳ್ಳಚಿ ಪ್ರಾಚಿತ್ ನಲ್ಲಕ್ಕಿ ಅಂಗೈ ಪೊಜ್ಜತ್ ಶಾಪ್ ಇಡುವಂಗೆ ಪಾಕುಡುವಂಗೆ ಎಣ್ಣುವ. ಅನ್ನನೆ ವಾಕುಡುವಂಗೆ ಕೆಟ್ಟಂಗ್ ನಲ್ಲಕ್ಕಿನ ದಾರು ಬಳಸುವಕ್ಕಾಗ್. ಎನ್ನೋ ದುಡ್ಡಾಕ್ ವಾಕ್ ಇಟ್ಟಿಟ್ಟ ವಾಕ್ ಒಂವ ವಾಕ್ ಕ್ರಮವೂ ಉಂಡ್.

ಇನ್ನನೆ ಸತ್ಯ ಧರ್ಮಕ್ ನೀತಿ ನಿಯಮಕ್ ಬೆಲೆ ಕೊಡಪಂತ ಪರ್ತ ಮೇಲ ಟ್ಟಿತ್ ಸಂಸ್ಕೃತಿನ ಬೊಳತಿಯೆಂಡ್ ಬಂದವು ಕೊಡಗ್ ಮೂಲ ನಿವಾಸಿಯ. ಇದ್‌ಂಗಲ್ಲ ಪೋಪಕ ಶಕ್ತಿಯಾಯಿತ್ ನಿಂದ ದೈವಿ ಶಕ್ತಿರ ನಲ್ಲಕ್ಕಿ ನಡುಬಾಡೆ. ಪಂಡ್ ಎಲ್ಲಾ ಧಾರ್ಮಿಕ ಪಿಂ ಇ ಸಾ ವಾ ಜಿ ಕ ಸಮರಂಭತ್ ನಲ್ಲಕ್ಕಿ ನಡುಬಾಡೆ ಉಮತಾಚಿ ಆಡುವೆಂಜತ್. ಆಚೇಂಗಿ ಇಂದ್ ಸುಮಾರ್ ಕ್ ಬಲ್ಲಮನೆ ಇಲ್ಲತಾಯಿಚಿತ್. ಇಕ್ಕತ ಪುದಿಯ ಮನೆಲ್, ಆಧುನಿಕ ಸಂಸ್ಕೃತಿಲ್ ಪಂಡೇರ ನಿರ್ಕನ ಪಾಲಿಟ್ಟಿ-ವಕ್ ಕಯಿಂಜಂಡಿಲ್ಲ. ಅಂದಿತೂ ನಲ್ಲಕ್ಕಿ ನಡುಬಾಡೆ ಎಣ್ಣುವ ಭಕ್ತಿನ ಮನಸ್ಸಲ್ ಎಲ್ಲಾರೂ ಬೆಚ್ಚವ.

**'ಕೊಡಗ್ ಆರ ಬೇರ'**  
ತಾಂಜ

**ಹೊಂಬೊಳಕ್ ತಿಂಗಳ ಪ್ರತಿಕ್ರಮ ಕೊಡವಾಮರ ಬೊಳಚಿ.**

<b>ಕೊಡಗಲ್ ಕ್ಯೂ ಧಾರಣೆ</b>	
<b>2013 ಮಾರ್ಚ್ ಆಖೀರಕ್</b>	
-ರೊಬಾಸ್ಕಾಕಾಫಿ	3000/-ಉ.
50ಕೆ.ಜಿ.ಕ್	
-ನಲ್ಲಮಳು 1ಕೆ.ಜಿ.ಕ್	350/-ಉ.
-ಮಾಲ 1 ಕೆ.ಜಿ.ಕ್	800/-ಉ.
-ಇಂಜಿ 60ಕೆ.ಜಿ.ಕ್	800/-ಉ.
-ನೆಲ್ 1ಕ್ವಿಂಟಾಲ್	950/-ಉ

**ಸುದ್ದಿ ಸಮಾಚಾರ**

**ಮಡಿಕೇರಿ ಫೀ.ಮಾ. ಕಾರ್ಯಪ್ಪ ಕಾಲೇಜ್ ಪಳೆ ವಿದ್ಯಾರ್ಥಿಯಡ ಕೂಟ**

ಮಡಿಕೇರಿ ಫೀ.ಮಾ. ಕಾರ್ಯಪ್ಪ ಕಾಲೇಜ್ ಪಳೆ ವಿದ್ಯಾರ್ಥಿಯಡ ಕೂಟ ಮಡಿಕೇರಿ ಫೀ.ಮಾ. ಕಾರ್ಯಪ್ಪ (ಸೀನಿಯರ್) ಕಾಲೇಜ್ ಪಳೆಂಜ ವಿದ್ಯಾರ್ಥಿಯಡ ಸಂಘತ್ ಆಡ್ಲ ಒತ್ತೋಮ್ ಕೂಟ ಇದೇ ಮಾರ್ಚ್ 24ಂಗೆ ಕಾಲೇಜ್ ಆಡಿಕೋರಿಯೆಂಲ್ ನಡಂದತ್. ಅಂದ್ ಪಳೆಯ ವಿದ್ಯಾರ್ಥಿ ಸಂಘತ್ ರ ಮೊದ್ ಗೇನ-ಸವಿ ನೆನಪು ಎಣ್ಣುವ ಕಾರ್ಯಕ್ರಮ ಏರ್ಪಡ್ತಿಯೆಂಜತ್. ಕಾಲೇಜ್ ಓದ್ ನಯೆಂಡ ಪರಸ್ಪರ ಪರಿಚಯ, ತಕ್ತ ಬಾಕ್, ಸಾಂಸ್ಕೃತಿಕ ಪ್ರದರ್ಶನ, ತರಾವರಿ ಪೈಪೋಟಿ, ಸಾಧಕಂಗಡ ಸನ್ಮಾನ ಇನ್ನತ-ದೆಲ್ಲಾ ಏರ್ಪಡ್ತಿಯೆಂಜತ್. 1949ಲ್ ಸ್ಥಾಪನೆಯಾನ ಈ ಕಾಲೇಜ್ ಇಕ್ಕ 64 ಕಾಲ.

**ಕೊಡಗಲ್ 3 ಕಡೆ ಸ್ಥಳೀಯ ಚುನಾವಣೆ**

ರಾಜ್ಯತ್ ಸ್ಥಳೀಯ ಸಂಸ್ಥೆ ಚುನಾವಣೆಲ್, ಕೊಡಗಲ್ ವಿರಾಜಪೇಟೆ, ಸೋಮವಾ-ರಪೇಟೆ ಪಿಂ ಇ ಕುಶಾಲನಗರ ಚೌನ್ ಪಂಚಾಯಿತಿಕ್ ತಾ.7.3.2013ಂಡ್ ಚುನಾವಣೆ ನಡಂದಾಂಡ ಪಳಿತಾಂಶ: ಮಡಿಕೇರಿಲ್ ಕೈಪಕ್ತತ್ ರ, ವಿರಾಜಪೇಟೆಲ್ 22 ಪಕ್ತತ್ ಅಭ್ಯರ್ಥಿಯ ಗೆದ್ದತ್. ಮೂಂಡ್ ಕಡೆ ಬಿಚಿಪಿರುವು ಏರ ಸೀಟ್ ಗೆದ್ದತ್.

**ಮಡಿಕೇರಿಲ್ ಜ.ತಿಮ್ಮಯ್ಯ ಪುಟ್ಟನ ದಿನ**

ಮಡಿಕೇರಿಲ್ ಫೀ.ಮಾ.-ಕಾರ್ಯಪ್ಪ ಪಿಂ ಇ ಜನರಲ್ ತಿಮ್ಮಯ್ಯ ಪೋರಂಕಾರ, ಸೇನಾನಿ, ಜನರಲ್ ಕೊಡಂ-ದೇರ ಎಸ್. ತಿಮ್ಮಯ್ಯಂಡ 107ನೇ ಪುಟ್ಟನ ನಮ್ಮನ ಮಾರ್ಚ್ 31 ಂಡ್ ಪೊಲಾಕ ಮಡಿಕೇರಿಲುಳ್ಳ ಸನ್ನಿ ಸೈಡಲ್ ಆಚರಣೆ ಮಾಡಚಿ.

**ಕೊಡಗಲ್ ನಮ್ಮೆ**

ಐಚಿಟ್ಟಿ ಪುದಿಯೊದಿ ನೆರೆ ವಿರಾಜಪೇಟೆ ಪಕ್ತತ ಮೈತಾ-ಡಿಲ್ ಐಚಿಟ್ಟಿರ ಒಕ್ಕಡ ಐನ್ ಮನೆಲ್, ಒಕ್ಕಡ ದೇವಿ ಪುದಿಯೊದಿ ತೆರ ಇದೇ ಏಪ್ರಿಲ್ 14 ಂಡ್ ಬೈಟೊಡಿ ನಡಪದುಂಡ್.

ಬೇರೆರ ತೆರೆ ವಿರಾಜಪೇಟೆ ಪಕ್ತತ ಮೈತಾಡಿಲ್ ಬೇರೆರ ಕುಟುಂಬತ್ ಕಾರೋಣ, ಚೌಂಡಿ ಪಿಂ ಇ ಬೈರವ ತೆರೆ ಇದೇ ಏಪ್ರಿಲ್ 25-26ಂಗೆ ನಡಪದುಂಡ್.

**ಮಡಿಕೇರಿ ಗದ್ದಿಗೆಲ್ ಪಾರ್ಕ್**  
ಮಡಿಕೇರಿಲ್ ರಾಜಂಡ ಗದ್ದಿಗೆಲ್ ಸುಮಾರ್ 50 ಲಕ್ ಉ. ಖರ್ಚಲ್ ಪಾರ್ಕ್ ವರಾಡಿತ್ ಕಯಿಂಜ ಮಾರ್ಚ್ 1 ಂಡ್ ಇದನ ತೊರಂದಿತ್.

**ಕುಟ್ಟು 5ನೇ ಕನ್ನಡ ಸಮ್ಮೇಳನ ಸನ್ಮಾನ**

ವಿರಾಜಪೇಟೆ ತಾಲೂಕರ್ 5ನೇ ಕನ್ನಡ ಸಾಹಿತ್ಯ ಸಮ್ಮೇಳನ ತಾ.13.3.2013 - ಂಡ್ ಕುಟ್ಟು ಕೊಡವ ಸಮಾಜತ್ ನಡಂದತ್. ಸಾಹಿತಿ ಕೇಚಮಾಡ ಸುಬ್ಬಮ್ಮ ತಿಮ್ಮಯ್ಯ ಅಧ್ಯಕ್ಷತೆ ವಹಿಸ್ ನ ಸಮ್ಮೇಳನತ್ 15 ಸಾಧಕಂಗಳ ಸನ್ಮಾನ ಮಾಡಚಿ. ಅವು: ಕಟ್ಟೇರ ಜಾಜಿ ಉತ್ತಪ್ಪ, ಶ್ರೀಮಂಗಲ - ಶಿಕ್ಷಣ, ಕಟ್ಟೇರಂಡಿ ಮಿಷ್ಣು ಕಾರ್ಯಪ್ಪ ನಾಲ್ಕೇ-ಸಮಾಜ ಸೇವೆ, ಪ್ರೊ.ಸಿ. ರಾಜು, ಗೋಣಿಕೊಪ್ಪ -ಕನ್ನಡ ಸೇವೆ, ಡಾ.-ಯತಿರಾತ್, ಗೋಣಿಕೊಪ್ಪ-ವೈದ್ಯಕೀಯ, ಕೊಟ್ಟಂಗಡ ಜಾನಕಿ, ಪೊನ್ನಂಪೇಟೆ-ಸಾಹಿತ್ಯ, ಮಲ್ಲೇಂಗಡ ಬೆಳ್ಳಪ್ಪ(ದಾದ), ಬಾಡಗ-ರಕೇರಿ-ಉದ್ಯಮ, ಕಟ್ಟೇರಂಡಿ ಪ್ರಕಾಶ್ ಪೊನ್ನಪ್ಪ, ಬಾಳೇಲೆ-ಸಮಾಜ ಸೇವೆ, ಬಾಚರಣಿ-ಯೆಂಡ ಎ. ನಾಣಯ್ಯ, ಟಿ.ಶೆಟ್ಟಿಗೇರಿ-ಕ್ರೀಡೆ, ಪಾತೆರ ಎಂ. ಮಾಯಿನಿ, ಕಾಯಿ-ಮಾನಿ-ನಾಡಮದ್ಯ, ಬೆಟ್ಟ ಕುರುಬ ಮಾರ, ಕುಟ್ಟ-ಚೀನಿ ಉರ್ ಪುಮ್ಲೊ, ಕಲಾ ಬಾಲಚಂದ್ರ, ಗೋಣಿ-ಕೊಪ್ಪ-ಕಲೆ, ಮಾತಂಡ ಎ. ರಮೇಶ್, ಬೊಳ್ಳಮಾಡ-ಸಹಕಾರ, ಪುಟ್ಟಚಂಡ ಐ. ಅಯ್ಯಣ್ಣ, ಸಿದ್ದಾಪುರ-ಸ್ವಯಂ ಸೇವೆ, ರಾಧಾಕೃಷ್ಣ, ತೋಲಟ್ಟಿ-ನಿವೃತ್ತ ಉಪಾಧಿಪಿಂ ಇ. ಬಿ.ಪಿ. ಮಲ್ಲ, ಸೈಂಟ್ ಏನ್ ವಿರಾಜಪೇಟೆ - ಪತ್ರನೇ ಕ್ಲಾಸ್ ಪರೀಕ್ಷೆಲ್ - ಕನ್ನಡತ್ ಏರ ಮಾರ್ಕ್ ಪಡಂದಾಂಗೆ.

**ಬೇಂಗ್‌ನಾಡ್ ಬಾಡಗ ಪೊವ್ವದಿ ನಮ್ಮೆ**

ಬೇಂಗ್‌ನಾಡ್ ಬಾಡಗತ್ ಪೊವ್ವದಿ ನಮ್ಮೆ ಇದೇ ಏಪ್ರಿಲ್ 5-6ಂಗೆ ನಡಪದುಂಡ್.

**ಜೋಡ್ ಭಗವತಿ ನಮ್ಮೆ**

ಬೇರಳೆನಾಡ್ ರುದ್ರಗುಪ್ತ ಶ್ರೀ ಜೋಡ್ ಭಗವತಿ ನಮ್ಮೆ ಕಯಿಂಜ ಮಾರ್ಚ್ 23ಲಿಂಜಿ ಸುರುವಾಯಿತ್. ಏಪ್ರಿಲ್ 4 ಂಗೆ ದೇವ ಕುಳಿರ ಕೂಡ ಆಖೀರ ನಮ್ಮೆ

**ಬಿಸು ನಮ್ಮೆ: ವಿಡ್‌ಮ್ಯಾರ್ ಒಂದ್(ಏಪ್ರಿಲ್ 14)**

ವಿಡ್‌ಮ್ಯಾರ್ ಒಂದ್ ಕೊಡವಕ್ ಕಾಲತ್ ರ್ ಆದಿ ದಿನ. ಪುದಿಯೆಂಡ್ ಪೂಮಳೆ ಪೂಜ್ಜೆ ಮರಗಿಡ ಸುಳಿ ಬೀಂದ್ ಬನಕಾಡ್ ಎಲಂಗಿಯೆಂಡಿಪ್ಪದ ನಂಗಕ್ ಕಾಂಬ. ವಿಡ್‌ಮ್ಯಾರ್ ಒಂದಾಂಗೆ ಕಾಲ ಪರಂದಾಂಡ ಮಾರೀಪತ್, ನಂಗ ಕ್ರತ್ರಿಯಳಾಯಿತ್ ಭೂಮಿ ಪಣಿಕಾರಳಾಯಿತ್ ಆದಿಂಜೇ ನಡಂದ್ ಬಂದವು. ಭೂಮಿ ತಾಯಿನ ಪೂಜುವ ದಿನ ಆಯಿತ್ 'ಬಿಸು' ಎಣ್ಣುವ ಪೆದತ್ ತೇಡಿ ನೆಲೆ ನಿಂದಯಿಂಗೆ.

ಆ ದಿನ ಕಾಕಿ ಪಕ್ತಿ ಏವಾಂಗೆ ಮುಪ್ಪಡೆ ಎದ್ದಿತ್ ಮನೆ ಮಾರ್ ಒಡ್ಕಿತ್ ಕುಳಚಂಡ್ ಮನೆ ಮಾರ್ಕ್ ಪುಣ್ಯ ತೀರ್ಥ ತಳಚಿತ್ ಅಂದಿ ತಿರಿ ಬೆಚ್ಚಿತ್ ಗುರು ಕಾರಣನ ತುಡಚಿತ್ ಮೂಂಡ್ ಕುರಿ ಅಕ್ಕಿ ಇಟ್ಟಿತ್ ಗುರುನ ತೊತ್ತಂಡ್ ಮನೆಲುಳ್ಳ ಪೆರಿಯೆಯಿಂಗೆಡ ಕಾಲ್ ಪುಡಿಪ. ಅಲ್ಲಿಂಜಿ ಎತ್ತ ಕೊಟ್ಟಿತ್ ಪೋಯಿತ್, ಕೊಟ್ಟರ ಉಬ್ಬಕ್ ಕೈ ನಮಸ್ಕಾರ ತೊತ್ತಿತ್ ಬೈಂದವೆಂಡು. ಬುದ್ಧಿಪ್ಪ ಎತ್ತಡೆ ನೆತ್ತಿಕ್ ಪುಣ್ಯ ನಿಲ್ ತಳಚಿತ್ ನಮಸ್ಕಾರ ವಾಡಿಯೆಂಂಡ್, ದೇವಳ ತೊತ್ತಂಡ್ ಬೆನ್, ತಟ್ಟ ಎತ್ತಳ ಎಪಿಯೆಂಡ್ ನೆಲ್ ಬಿತ್ತುವ ಯಾಕತ್ ಆಟಿಯೆಂಡ್ ಪೋಂಡು. ಅಲ್ಲಿ ಸೂರ್ಯ ಉದಾಚಂಡ್ ಬಪಾಂಗೆ ಎದ್‌ಪಾಯಿತ್ ನಿಪು ಚಿಟ್ಟಂಡ್ ಎತ್ತಡ ನಿಪುಕ್ ನೋಗ ಬೆಚ್ಚಿತ್ ನೇಂಗೆ ಕಟ್ಟೋಂಡು. ಸೂರ್ಯ ದೇವಂಗೆ ಎದ್‌ಪು, ನೋಗಕ್ ತಡಿ ಪಡಾವನಕ್ ನಿಂದಂಡ್ ದಂಡ್ ಕೈಲ್ ಪುಡಿ ಅಕ್ಕಿನ ಪುಡಚಂಡ್ ಸೂರ್ಯ ದೇವಳ ತೊತ್ತಿತ್ ಮೂಂಡ್ ಕುರಿ ಅಕ್ಕಿ ಇಟ್ಟಿತ್, ಗುರು ಕಾರಣನ ತುಡಚಿಂಡ್ ನೋಗಕೂ, ಭೂಮಿ ತಾಯಿಕೂ ಮೂಂಡ್ ಕುರಿ ಅಕ್ಕಿ ಇಟ್ಟಿತ್ ನೇಂಗೆ ಪುಡಚಂಡ್ ಮೂಂಡ್ ಸುತ್ತು ಉತ್ತಿತ್ ಎತ್ ಕೈಕೊಂಡು. ಎತ್ತಡೆ ನೋಗ ಬೆಚ್ಚಿ ನಿಪುನ ತೇಟಿತ್ ಬುಡೋಂಡು. ಉತ್ತ ಜಾಗತ್ ತೋರಳೆ ತೊಪುನ ಇಡಂಡು.

**ಅಜ್ಜಿ ಕುಟ್ಟಿರ ಕಾರೋಣ ತೆರೆ**

ಚಿಕ್ಕಮಂಡೂಲ್ ಮಾವೀರ ಅಜ್ಜಿನಾಯಕ ಅಜ್ಜಿ ಕುಟ್ಟಿರ ಕಾರಣನಾಚೇಂದ್ ಎಣ್ಣುವ. ಇಲ್ಲಿ ಇದೇ ಏಪ್ರಿಲ್ 13-14ಂಗೆ ಇಲ್ಲಿ ಕಾರೋಣ ತೆರೆ ನಡಪದುಂಡ್.

**ಬಾಳೆಗೋಡ್‌ಲ್ 17ನೇ ಮಾದಂಡ ಕಳ್ಳ ಹಾಕಿ ನಮ್ಮೆ**



ಕೊಡಗಲ್ ಕೊಡವ ಹಾಕಿ ಆಕಾಡಮಿರ ಆದನಲ್ ನಡಪ

ಈ ಶಾಸ್ತ್ರಕ್ ಬಿಸುಕ್ ಭೂಮಿಕ್ ಎತ್ ಉಳ್ಳಪೋಂಡ್ ಎಣ್ಣುವ. ಮಿಂಚಕ್ ಮಳೆ ಪೊಜ್ಜಂಡ್ ಬಂದನಕ್ ಭೂಮಿ ಪಣಿಯೂ ಜೋರಾಯೆಂಂಡ್ ಬೋಪ. ವಿಡ್‌ಮ್ಯಾರ್ ಒಂದ್ ಪಿಸು ದಿನ ನಂಗಕ್ ಪುದಿಯ ಪಿಂ ಇ ಆದಿ ದಿನಾಂ ಪಂಡಂಜೇ ನಡಂದ್ ಬಂದಿತ್. ಬಿಸುರಂದ್ ಮನೆಲ್ ಶುದ್ಧ ಮುದ್ದಿಕೆ ನೋಟ್ಟವ. ಎಚಿ-ಮೀನ್ ಮಾಡುಲೆ. ಅಂದ್ ಪಾಯಸ ಇಲ್ಲೇಂಗಿ ದೋಸೆ ಮಾಡಿತ್ ತಿಂಬದ್ ಕ್ರಮ. ಇಂದೇತ ಆಧುನಿಕ ದಿನತ್ ಕೃಷಿ ಪಣಿಲ್ ಎತ್ತ-ಕಡಚಿಯಡ ಪಣಿ ಮರೆಯಾಯೆಂಡ್ ಬಂದ್‌ಚಿತ್. ಜನ ಬಿಸುರಂದ್ ಎತ್ ಉಳ್ಳಪುವದ್ ಮಾಡಲೆಂ-ಗಿಯೂ ಶುದ್ಧ ಮುದ್ದಿಕೆಲ್ ಪಾಯಸ/ದೋಸೆ ಮಾಡಿತ್ ತಿದಕ ನಮರ ಭೀರ್ಯ ಉಳ್ಳವ. ನಂಗಡ ವಿಶೇಷ ನಾಳಂದೇಣ್ಣ-ವದ ಉಳವ.

-ಕೇಕಡ ಎಸ್. ಚಂಗಪ್ಪ  
ರಾಮೂರ್ತಿನಗರ, ಬೆಂಗಳೂರ್

**ಗೋಣಿಕೊಪ್ಪ ಕುಟ್ಟಿ ರಸ್ತೆ**

ಮಣಸೂರಂಜಿ ಗೋಣಿಕೊಪ್ಪ-ಪೊನ್ನಂಪೇಟೆಕಾಲೆ ಕುಟ್ಟಿಕ್ತಣೆರ ಅಗಲ ರಸ್ತೆ ಮಾಡವ ಪಣಿ ಸುರುವಾಯಿತ್. ಪೊನ್ನಂಪೇಟೆ ಚೌನ್ ಸುಮಾರ್ ಪಳೆಯ ಕುಟ್ಟಿರ ಒಡ್‌ತಿತ್ ರಸ್ತೆ ಅಗಲ ಮಾಡಿತ್. ಗೋಣಿಕೊಪ್ಪತ್ ರಸ್ತೆ ಒಡಪಕ್ ವ್ಯಾಪಾರಿಯ ಚೆನ್ನ ಸಮಯ ಕೇಟಂಡಿತ್‌ಂದೂ ಗೊತ್ತಾಯಿತ್.

**ಸೋಮವಾರಪೇಟೆಲ್ ಆಸ್ಪೋಟರ್ಪ್ ಹಾಕಿ ಪರಂಬು**

ಸೋಮವಾರಪೇಟೆ ಕರ್ಕಾರಿ ಪರಂಬುಲ್ ಪೂರ್ವ ಕಾಲೇಜ್ ಪರಂಬುಲ್ ಸುಮಾರ್ 3.4 ಕೋಟಿ. ಉರಪಿಯ ಖರ್ಚಲ್ ಆಸ್ಪೋಟರ್ಪ್ ಹಾಕಿ ಪರಂಬು ಮಾಡವಕ್ ಮೊಳ ಇಟ್ಟಿತ್.

**ಪೊನ್ನಂಪೇಟೆ ಸಿಬಿಟಿ ಲ್ 'ಕಾಲೇಜ್ ಡೇ'**

ಪೊನ್ನಂಪೇಟೆ ಪಕ್ತತ ಹಳ್ಳಿ-ಟ್ಟುಲ್ ಉಳ್ಳ ಕೋಗ ಇನ್-ಟ್ರೂಟ್ ಆಫ್ ಟೆಕ್ನಾಲಜಿ (ಸಿಬಿಟಿ)ಲ್ ಕಯಿಂಜ ಮಾರ್ಚ್ 14 ಪಿಂ ಇ 15 ಂಗೆ ಅಂತರ ಕಾಲೇಜ್ ತಾಂತ್ರಿಕ ನಮ್ಮೆ-ತಿಂಜತ್. ಸಾಂಸ್ಕೃತಿಕ ಕಾರ್ಯ-ಕ್ರಮತ್ ಪಾಟ್, ಡಾನ್, ಪಾಶನ್ ಶೋ, ಕಿರ್ ನಾಟಕ್ ಇನ್ನತಾನ ಏರ್ಪಡ್ತಿಯೆಂಜತ್.

17ನೇ ಕಾಲತ್ರ ಮಾದಂಡ ಕೊಡವ ಒಕ್ಕಡೊಕ್ಕಡ ಹಾಕಿ ಕಳೆನಮ್ಮ ಇದೇ ಏಪ್ರಿಲ್ 17ಂಡ್ ಕೊಡವ ಸಮಾಜ ಒಕ್ಕೂಟತ್ ಬಾಳೆಗೋಡ್ ಪರಂಬುಲ್ ಸುರುವಾಪ-ದುಂಡ್. ಮೇ 4ಂಡ್ ಹಾಕಿ ನಮ್ಮ ಪೈನಲ್ ನಡಪ. ಮಾದಂಡ ಒಕ್ಕಕಾರ ಹಾಕಿ ನಮ್ಮತ್ ಎಲ್ಲಾ ತಯಾರಿ ಮಾಡ್ತಂಡಿತ್.

**ಮೈತಾಡಿಲ್ ಐಚ್ಚಿಣ್ ಪುದಿಯೋದಿ ತೆರೆ**



ವೀರಾಜಪೇಟೆ ಪಕ್ಕತ ಮೈತಾಡಿ ಐಚ್ಚಿಣ್ ಐನ್ ಮನಲ್ ಪುದಿಯೋದಿ ತೆರೆ ಮೀನಾರ್ ತಿಂಗ ಪೋಪ ಚಂಗಾಂಡಿ-ರಂದ್ ನಡಪ್. ಪುದಿಯೋದಿ ತೆರೆನ ಮೈತಾಡಿ ಬಲ್ಲ ಮನಲೂ, ಚೇಲಾವರ ಗ್ಲಾವು ತೂ ಕೆಟ್ಟಿತ್ ಕೊಂಡಾಡುವದುಂಡ್. ಇಲ್ಲಿ ಮಲಯಾಳತಂಜ ಬಣ್ಣಂಗ ಬಂದಿತ್ ತೆರೆ ಕಟ್ಟುವ. ಏಪ್ರಿಲ್ 14 ಂದ್ ಪೊಲಾಕ ಬಣ್ಣಂಗ ಬಂದಿತ್ ತೆರೆಕುಳ್ ಸಾಮಾನಲ್ಲ ಸರಿ ಕೂಟವ್. ಸುಮಾರ್ ಸಾವುನಾ ನಂಗಡ್ ಕೈಮಡತಾಲೇ ಇಪ್. ಪೊಂಜಿ ಎಣ್ಣುವದ್ ಆ ತೆರೆರ ಪುಂಪಿಪಟ್ಟ ಸಾಮಾನಾ. ಬಣ್ಣಂಗ ಬಂದನೆಕೆ ಒಕ್ಕಡ ಬಲ್ಲೋರ್ ಕಡಾಯತ್ ಬ್ ಟೆನ್ನ್ ನಲ್ಲ ಎಣ್ಣೆ ಬೂಕಿಪ್ಪ. ಪೊಂಜಿ ಮೈತಾಡ್ ವಕ್ ಕೊ ಮೂಂಡ್ ಮೀಟರ್ ಬೊಳತ ಪುದಿಯ ಬಟ್ಟೆ ಚೆನ್ನ ಚೇರಿ, ದಂಡಡಿ ಉದ್ದೆ ಓರ್ ಇಂಚ್ ಬಣ್ಣತರ ಆರ್ ಕೋಲ್ ಬೋಂಜಿಪಾವ.

ಕೋಲ್ ತುದಿಕೆ ತೆಂಗರ ಬಣ್ಣತರ ಚಕ್ ಚೇರಿನ ಸುತ್ತುವಂಜಿ ಬೊಳತ ಬಟ್ಟೆಲ್ ಸುತ್ತುವಂಜಿ ಆ ಎಣ್ಣೆ ಬೂಕಿನ ಕಡಾಯಕೇ ಎಣ್ಣೆ ಕುಡಿಪಕ್ ಇಡವ್. ಈ ತರ ಆರ್ ಪೊಂಜಿ ಮಾಡಂಡು. ಪರಕೆ ಕಯಪ್-ಚಿಡವವು 12 ಉರ್ಪಿಯ ಒಕ್ಕಕ್ ಕೊಡ್ ತೇಂಗಿ ಇಂಚ್ ಕೋಲ್ ಪೊಂಜಿ ಮಾಡಿತ್ ಎಣ್ಣೆ ಕಡಾಯಕ್ ಇಟ್ಟಿಪ್ಪ. ಕಾಲೋದಿ ಇಂಥ ಪರಕೆ ಪೊಂಜಿ ಅಂಜಾರ್ ಇಪ್. ಇಂದ್ ಮೂಂಡ್ ತೆರೆ ಉಂಡ್. ಬೈಟಾಪ್ ಕ ಬಂದ್ ಕಳೂ, ಮನೆಕಾರಳೂ, ವಾಲಗಕಾರ ಎಲ್ಲಾ 8 ಗಂಟೆಕ್ ಬಲ್ಲ ಮನೆಕ್ ಕೂಡಿತ್ ಊಟೋಪಚಾರ ಆಯಿತ್ ಕೈಮಡಕ್ ಪೋಪ. ಬೈಟ್ 11 ಗಂಟೆಕೆ ಬೀರ ತೆರೆ ಕಟ್ಟುವ. ಅದ್ ಪೇರ್ತ್ ಬೋರ್ಲ್ ಇಪ್. ತೆರೆ ಮನೆಕ್ ಬಂದಿತ್

ತೆರೆ ಕೈಪುಡಚಿತ್ ಕೈಮಡ-ತಾಂಜ ಮನೆಕ್ ಕೂಟಿಯ ಬಪ್ಪ. ಅಲ್ಲಿಂಜಿ ಮೂಂಡ್ ಕುರಿ ಕೂತ್ ಕೂಡಪ್.

ಪರಕೆ ಪೊಂಜಿಕ್ಲ ತಿತ್ ಕತ್ ಚಿಟ್ಟಂಡ್ ಬಾಲಕಾರ ಕೂಡ್ ಬಪ್ಪ. ತೆರೆಕ್ ಎಲ್ಲಾರೂ ಭಕ್ತಿಲ್ ಪೊಂಜಿಕ್ ಪಯಿನಯಿನ ಬೂಕವ. ಅಕ್ಕ ಪೊಂಜಿ ಚೋರಾಯಿತ್ ಕತ್ ವ. ಸುಮಾರ್ ಅರೆ ಗಂಟೆ ನೇರ ತೆರೆ ಪಟ್ಟಿಲ್ ನಿಂದಿತಿಪ್ಪ. ಅಲ್ಲಿಂಜಿ ಕೈಮಡ್ ಪೋಯಿತ್ ಹಾರ ಎಡಪ್. ಕೋಳಿ ಅರಪ್. ಪುನ: ವಾಪಾಸ್ ಮನೆಕ್ ಬಂದಿತ್ ಕಂಪ್ಯಾಲಲ್ ಅಳಪದೂ ಪೊಣ್ಣಾಳ ಪಾಲ್. ಕಳ್ ಕೂಡಪ್. ಅಲ್ಲಿಂಜಿ ಅನುವಾದ ಕೇಪ. ಅದಂಡ ಬರಿಲ್ ಭಂಡಾರ ತಟ್ಟೆನ ಓರ್ ಬಾಲಕಾರ ಪುಡಚಂಡ್ ಬಪ್ಪ. ಭಂಡಾರ ಇಟ್ಟನೆಕ್ ಕುರಿ ಕೇಟವಂಡು. ಮಂಜತನೋ, ಅಕ್ಕಿನೋ ಕೂಟಿತ್ ಕಣ್ಣ ಮಕ್ಕಳುಂಡ್ ಕುಟ್ಟಿಚಿಟ್ಟಿತ್ ಮಾಡ್ ನ ಪೊಡಿ ಆ ಕುರಿ. ಈ ಕುರಿನ ಒಕ್ಕಕಾರ, ತಾಮನೆ ಮೂಡಿಯ ಎಡ್ಡಂಡ್ ಓರ್ ಕಾಲಕತ್ತಣ್ ನೆತ್ತಿಕ್ ಇಡವಕ್ ಬಿಡ್ಪ. ಅಲ್ಲಿಂಜಿ ಕೆರೆ ಕೈಮಡಕ್ ಪೋಪ. ಅಲ್ಲಿ ಬೋರೆ ದಂಡ್ ತೆರೆ ಮನೆಕ್ ಬಪ್ಪಲ್. ಇನ್ನಿನ ಐಚ್ಚಿಣ್ ತೆರೆ ನಾಡಲ್ ಪೇರ್ತ್ ಕೇಳಿಪಟ್ಟಿತ್. ನಲ್ಲ ಬೀರ್ಯ ಬರ್ಕತ್ ನಡಂ-ದಂಡುಂಡ್.

ತೆರೆ ಕಟ್ಟುವಕ್ ಬಣ್ಣಂಗ ಅಪ್ಪಪ್ಪಂಗಡ ಕಾಲತಾಂಜ ಅಯಿಂಗ್ ಖಾಯಂ ಬಪ್ಪಾನಗುಂಡ್ ಅಯಿಂಗಕ್ ಪೊನ್ನರ ಕಟ್ಟಿ ಬಳಿ ಕೂಡತಿತ್. ಆ ಬಳಿ ನೋರೆ ದಾರಕೂ ಮಾರುವದೂ, ಕೂಡಪದೂ ಮಾಡ್ ವಕ್ಯಂ, ಅನ್ ತ ನಂಬಿಕೆ ಅಯಿಂಗುಂಡ್. ಚೆನ್ನ ಕಾಲ ಬಯ್ಯ ಎಂತೋ ಕಪ್ಪಕ್ ಬಣ್ಣ ಅಡೆ ಬೆಚ್ಚಾನಗುಂಡ್ ಅವಿಂಗ್ ಸುಖಿ ಇಲ್ಲತಾಚೆಲ್ಲೊ. ಅಲ್ಲಿಂಜಿ ಪುದಿಯೋದಿ ದೇವಿ ಪರಕೆ ಕೆಟ್ಟನದು ಹುಷಾರಾ-ಚೆಲ್ಲೊ. ಆ ಬಣ್ಣ ತಿತ್ತ ಕಾಲ ಬಂದಿತ್ ಪರಕೆನ ತೀರತ್ ಲೊ.

**ಐದೇಟಿರ ಜ್ಯೂಸಿ ಮಾಡಪ್ಪ ಬೆಂಗಳೂರ್**

**ನಂಗಡ್ಲ ಪುದಿಯ ಶಣ್ಣ- 4 ಸೆಟ್ ಆಯಿತ್**

ನಂಗ ಸುಲಭತ್ ಎಣ್ಣಾವ 'ಸೆಟ್' ಆಯಿತ್ ಶಬ್ದ ಇಕ್ಕ ಎಲ್ಲಾಗೂ ಬಳಕೆ ಆಯೆಂಡುಂಡ್. ಮಕ್ಕ ಓದಿತ್ ಉದ್ಯೋಗತ್ ಇಂಜಕ ನೇರೆ ಅಂವೊ/ಅವ ಸೆಟ್ ಆಯಿತ್ ಅಂದ್ ಎಣ್ಣೆರಾವ. ಮಂಗಲಾಯಿತ್ ದಂಪತಿಯ ಚಾಚಿಲ್ ನೈಚಂಡ್-ಖರ್ಚ್ ನಮ್ದಿರ ಜೀವನವೇ ನಂಗಡ ಸೆಟ್ ಮಂಟ್! ಲೆಕ್ಕಾಚಾರ ಆಚಿ. ಸಂಸಾರ ನೋಟಿಯಂಡ್ ಸಂಸಿಲ್ ಪೋಯೆಂಡಿಂಜಕ ಅಕ್ಕಲೂ ಅವು ಸೆಟ್ ಆಯಿತ್ ನಲ್ಲ ಪರವ. ಸೆಟ್/ಮಂಟ್ ಶಬ್ದ ಇಕ್ಕ ನಂಗಡ ಉದ್ಯಮಿತ್ ಲೋ, ಆ ಸಿ ಪಾಸ್ತಿ ಲೋ ಚಾಯಿಲ್ ನಲ್ಲಾಮಕೂ 'ಸೆಟ್' ಮಣ್ಣಿತ್ ಬೊಳಂದಂಡ್ ಬಂದಕ ಅವು ಸೆಟ್ ಆಯಿತ್ ಪರವ. ಒಟ್ಟಾರೆ ತೊಂದರೆ ಇಲ್ಲತೆ. ಬೋರೆಯಿಂಗಕ್ ತೊಂದರೆ-ತಾಪತ್ರ ಮಾಡತೆ ಚಾಯಿಲ್ ಬದ್ಕಿಯೆಂಡಿಂಜಕ ಆಯಿಂಗ ಆಯಿತ್ ಅಂದ್ ಎಣ್ಣೆರಾವ. ದುಡ್ಡ್ ಕಾಸ್ ಅನುಕೂಲ, ಚಾಯಿಲ್ ನೈಚಂಡ್-ಖರ್ಚ್ ನಮ್ದಿರ ಜೀವನವೇ ನಂಗಡ ಸೆಟ್ ಮಂಟ್! ಲೆಕ್ಕಾಚಾರ ಆಚಿ. ಸಂಸಾರ ನೋಟಿಯಂಡ್ ಸಂಸಿಲ್ ಪೋಯೆಂಡಿಂಜಕ ಅಕ್ಕಲೂ ಅವು ಸೆಟ್ ಆಯಿತ್ ನಲ್ಲ ಪರವ. ಸೆಟ್/ಮಂಟ್ ಶಬ್ದ ಇಕ್ಕ ನಂಗಡ ಉದ್ಯಮಿತ್ ಲೋ, ಆ ಸಿ ಪಾಸ್ತಿ ಲೋ ಚಾಯಿಲ್ ನಲ್ಲಾಮಕೂ 'ಸೆಟ್' ಮಣ್ಣಿತ್ ಬೊಳಂದಂಡ್ ಬಂದಕ ಅವು

**ಕೊಡವ ಒಕ್ಕಡೊಕ್ಕಡ ಹಾಕಿ ಕಟಿ ನಮ್ಮಿ ದಿವರ**

ನಂ.	ಹಾಕಿ ಕಳಿ ಊರ್	ನಡತನ ಒಕ್ಕ	ಕಳಿಚಿ	ಗದ್ದವು
1.	1997	ಕರಡ	ಪಾಂಡಂಡ	60 ಕಲಿಯಂಡ
2.	1998	ಕಡಂಗ	ಕೋಡಿರ	116 ಕುಟ್ಟೇಟಿರ
3.	1999	ಕಾಕೋಟಪರಂಬು	ಬಲ್ಲಚಂಡ	140 ಕುಟ್ಟೇಟಿರ+ ಕೂತಂಡ
4.	2000	ಪೊನ್ನಂಪೇಟೆ	ಚೆಪ್ಪುಡಿರ	170 ಕೂತಂಡ
5.	2001	ಅಮ್ಮತ್ತಿ	ನಲ್ಲಮಕ್ಕಡ	226 ಕೂತಂಡ
6.	2002	ಹದಿಕೇರಿ	ಚಕ್ಕೇರ	252 ಕುಟ್ಟೇಟಿರ
7.	2003	ನಾಪೋಕ್ಲ	ಕಲಿಯಂಡ	281 ನಲ್ಲಮಕ್ಕಡ
8.	2004	ಮಾದಾಪುರ	ಮಾಳಿಯಂಡ	235 ಕೂತಂಡ
9.	2005	ಮಡಿಕೇರಿ	ಬಿದ್ದಂಡ	222 ನಲ್ಲಮಕ್ಕಡ
10.	2006	ಪೊನ್ನಂಪೇಟೆ	ಕಳಿಚಂಡ	217 ಪಳಂಗಂಡ
11.	2007	ಕಾಕೋಟಪರಂಬು	ಮಂಡೇಟಿರ	184 ಮಂಡೇಪಂಡ
12.	2008	ಪೊನ್ನಂಪೇಟೆ	ಅಳಮೇಂಗಡ	216 ಅಂಜಪರವಂಡ
13.	2009	ಅಮ್ಮತ್ತಿ	ಮಂಡೇ ಪಂಡ	223 ನಲ್ಲಮಕ್ಕಡ
14.	2010	ಪೊನ್ನಂಪೇಟೆ	ಮನೆಯಪಂಡ	214 ಪಳಂಗಂಡ
15.	2011	ಪೊನ್ನಂಪೇಟೆ	ಮುಚ್ಚಾಮಾಡ	228 ಪಳಂಗಂಡ
16.	2012	ಅಮ್ಮತ್ತಿ	ಐಚಿಟ್ಟಿರ	217 ಪಳಂಗಂಡ
17.	2013	ಬಾಳಗೋಡ್	ಮಾದಂಡ	- ?

**ಕೊಡವ ಒಕ್ಕಡೊಕ್ಕಡ ಕ್ರಿಕೆಟ್ ಕಟಿ ನಮ್ಮಿ ದಿವರ**

ನಂ.	ಕ್ರಿಕೆಟ್ ಕಳಿ ಊರ್	ನಡತನ ಒಕ್ಕ	ಗದ್ದವು
1.	2000	ವೀರಾಜಪೇಟೆ	ಕೀತಿಯಂಡ ಬಲ್ಲಚಂಡ
2.	2001	ವೀರಾಜಪೇಟೆ	ತಾತಂಡ ಮಣವಟ್ಟಿರ + ಬಲ್ಲಚಂಡ
3.	2002	ನಾಪೋಕ್ಲ	ಬಲ್ಲಂಡ ಬಲ್ಲಚಂಡ
4.	2003	ಬಾಳೆಲೆ	ಕಾಂಡೇರ ಮಾತಂಡ
5.	2004	ನಾಪೋಕ್ಲ	ಮಣವಟ್ಟಿರ ಮಾತಂಡ
6.	2005	ವೀರಾಜಪೇಟೆ	ಕುಂಡ್ರೆಡ ಮಣವಟ್ಟಿರ
7.	2006	ವೀರಾಜಪೇಟೆ	ಅಮ್ಮಣಿಚಂಡ ಮೂಕೋಂಡ+ ಚಕ್ಕೇರ
8.	2007	ವೀರಾಜಪೇಟೆ	ನಂಬುಡುಮಾಡ ಚಕ್ಕೇರ
9.	2008	ವೀರಾಜಪೇಟೆ	ಕೂತಂಡ ಕಾಣತಂಡ
10.	2009	ಪೊನ್ನಂಪೇಟೆ	ಕೋಳಿರ ಕಾಣತಂಡ
11.	2010	ಬಾಳೆಲೆ	ಬಲ್ಲಮಾಡ ಕಾಣತಂಡ
12.	2011	ಅಮ್ಮತ್ತಿ	ಮಾಚಿಮಂಡ ಚಕ್ಕೇರ
13.	2012	ಮಾದಾಪುರ	ಚಾಮೇರ ಕಾಣತಂಡ
14.	2013	ಬಾಳೆಲೆ	ಅಡ್ಡೇಂಗಡ ?
15.	2014	ಕೋಕ್ಕೇಂಗಡ	

**'ಪೊಂಬೊಳಕ್' ಎಣ್ಣೆ ಅಯಿರಿ.**

**'ಪೊಂಬೊಳಕ್' ತಿಂಗ ಪತ್ತಿಕೆಕ್ ನಿಂಗ ಕಥೆ, ಕವನ, ವಿಶೇಷ ಎಣ್ಣೆ, ಸುದ್ದಿ, ಇನ್ನಿತಾನ ಅಯಿಕ್ಕಲು.**

ಜಾಹೀರಾತ್ ತರೋಲು. ವಿಳಾಸ: ಸಂಪಾದಕ ಪೊಂಬೊಳಕ್ ಕೊಡವ ಸಮಾಜ ಬೆಂಗಳೂರ್ ನಂ.7, 1ನೇ ಮುಖ್ಯ ರಸ್ತೆ, ವಸಂತನಗರ, ಬೆಂಗಳೂರ್-560052